

漢書門
 三〇
 〇以七七
 册架兩號類

八〇
 〇
 〇

內閣文庫	
番號	漢 4407
冊數	30 (1)
函號	280 20

280-20



晉書目錄

唐太宗文皇帝御撰

皇明承直郎國子監司業臣方從哲等

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修

凡百三十卷

本紀十

志二十

列傳七十

載記三十

晉書卷一

帝紀第一

高祖宣帝懿

晉書卷二

帝紀第二

世宗景帝師

太祖文帝昭

晉書卷三

帝紀第三

世祖武帝炎

晉書卷四

帝紀第四

孝惠帝衷

晉書卷五

帝紀第五

孝懷帝熾

孝愍帝鄴

帝紀第六

中宗元帝胤

蕭宗明帝 紹

晉書卷七

帝紀第七

顯宗成帝 衍

康帝 岳

晉書卷八

帝紀第八

孝宗穆帝 暉

哀帝 丕

廢帝海西公 奕

晉書卷九

帝紀第九

太宗簡文帝 昱

孝武帝 曜

晉書卷十

帝紀第十

安帝 德宗

恭帝 德文

志

晉書卷十一

萬曆二十四年刊

晉書目錄

志第一

天文上

晉書卷十二

志第二

天文中

晉書卷十三

志第三

天文下

晉書卷十四

志第四

地理上

晉書卷十五

志第五

地理下

晉書卷十六

志第六

律歷上

晉書卷十七

志第七

律歷中

晉書卷十八

志第八

律歷下

晉書卷十九

志第九

禮上

晉書卷二十

志第十

禮中

晉書卷二十一

志第十一

禮下

晉書卷二十二

志第十二

樂上

晉書卷二十三

志第十三

樂下

晉書卷二十四

志第十四

萬曆二十四年刊

晉書目錄

五

職官

晉書卷二十五

志第十五

輿服

晉書卷二十六

志第十六

食貨

晉書卷二十七

志第十七

五行上

晉書卷二十八

志第十八

五行中

晉書卷二十九

志第十九

五行下

晉書卷三十

志第二十

刑法

列傳

萬曆二十四年刊

晉書目錄

六

晉書卷三十一

晉書目錄

列傳第一 后妃上

宣穆張皇后

景懷夏侯皇后

景獻羊皇后

文明王皇后

武元楊皇后

武悼楊皇后

左貴嬪 胡貴嬪
諸葛夫人

惠賈皇后

惠羊皇后

謝夫人

懷王太后

元夏侯太后

晉書卷三十二

列傳第二 后妃下

元敬虞皇后

荀豫章君

明穆庾皇后

成恭杜皇后

章周太妃

康獻褚皇后

穆章何皇后

哀靖王皇后

萬曆二十四年刊

晉書目錄

廢帝庾皇后

簡文宣鄭太后

簡文順王皇后

孝武文李太后

孝武定王皇后

安德陳太后

安僖王皇后

恭思褚皇后

晉書卷三十三

列傳第三

王祥

弟覽

鄭沖

何曾

子劭

遵

石苞

子崇

歐陽建

孫鑠

晉書卷三十四

列傳第四

羊祜

杜預

子錫

晉書卷三十五

列傳第五

陳騫

子輿

裴秀

子頎

楷子憲

從弟楷

晉書卷三十六

萬曆二十四年刊

晉書目錄

列傳第六

衛瓘

子恒

孫瑛

玠

張華

子禧

遵

劉卞

晉書卷三十七

列傳第七

宗室

安平獻王孚

子邕

邕弟義陽成王望

望弟太原成王輔

整弟竟陵王楙

翼弟下邳獻王晃

晃弟太原烈王瓌

彭城穆王權

孫統

綬子俊

高密文獻王泰

子孝王略

略兄新蔡武哀王騰

略弟南陽王模

騰子莊王確

范陽康王綏

子臈

濟南惠王遂

曾孫勳

譙剛王遜

子閔王承

承子烈王無忌

無忌子敬王恬

恬子忠王尚之

高陽王睦

尚之弟恢之

恬弟悛

任城景王陵

弟順

西河繆王斌

晉書卷三十八

列傳第八

宣五王六王

平原王幹

琅邪王伋

九

子觀 子觀 子觀 子觀

清惠亭侯京

扶風王駿

子暢 子暢

梁王彤

齊王攸

子綖 子綖 贊 寔

城陽王兆

遼東王定國

廣漢王廣德

樂安王鑒

樂平王延祚

晉書卷三十九

列傳第九

王沉

子浚

荀顛

荀勗

子藩 藩子邃 邃子奕 潘弟組 組子奕 間

馮紘

晉書卷四十

列傳第十

賈克

孫謚 族子模 兄弟混 鄭彰

楊駿

弟珧 濟

晉書卷四十一

列傳第十一

魏舒

李憺

劉寔

弟智

高光

晉書卷四十二

萬曆二十四年刊

晉書目錄

列傳第十二

王渾 子濟

王濬

唐彬

晉書卷四十三

列傳第十三

山濤 子簡 簡子還

王戎 從弟衍 衍弟澄 郭舒

樂廣

晉書卷四十四

列傳第十四

鄭袤 子默 默子球

李胤

盧欽 子浮 弟挺 挺子志 志子謙

華表 子虞 虞子恒 虞弟嶠

石鑿

温羨

晉書卷四十五

列傳第十五

劉毅 子暉 程衛

和嶠

武陔

任愷

崔洪

郭奕

侯史光

何攀

晉書卷四十六

列傳第十六

劉頌

李重

晉書卷四十七

列傳第十七

傅玄

子咸

咸從父弟祗

晉書卷四十八

列傳第十八

向雄

段灼

閻纘

晉書卷四十九

列傳第十九

阮籍

兄子咸從子修

咸子瞻族弟放

瞻弟孚放弟裕

嵇康

向秀

劉伶

謝鯤

胡母輔之

子謙之

畢卓

王尼

羊曼

弟聃

光逸

晉書卷五十

萬曆二十四年刊

晉書目錄

七

列傳第二十

曹志

庾峻

子珉

珉弟敬

郭象

庾純

子勇

秦秀

晉書卷五十一

列傳第二十一

皇甫謐

子方回

摯虞

束皙

王接

晉書卷五十二

列傳第二十二

郤詵

阮种

華譚

袁甫

晉書卷五十三

列傳第二十三

愍懷太子遹

子彰

臧

尚

晉書卷五十四

列傳第二十四

陸機

孫拯

弟雲

弟眈

從父兄喜

晉書卷五十五

列傳第二十五

夏侯湛

弟淳

淳子承

潘岳

從子尼

張載

弟協

協弟亢

晉書卷五十六

列傳第二十六

江統

子彰

惇

孫楚

子衆海纂纂子統綽

晉書卷五十七

列傳第二十七

羅憲

兄子尚

滕修

馬隆

胡奮

陶璜

吾彥

張光

趙誘

晉書卷五十八

列傳第二十八

周處

子玘

玘子勰

周訪

子撫

撫子楚

楚子瓊

瓊子熾

熾弟光

光子仲孫

晉書卷五十九

列傳第二十九

汝南文成王亮

子粹

矩

羨

宗

熙

楚隱王瑋

趙王倫

齊王冏

鄭方

長沙厲王乂

成都王穎

河間王顥

東海孝獻王越

晉書卷六十

列傳卷三十

解系

弟結

結弟育

孫旂

孟觀

牽秀

繆播

從弟胤

皇甫重

張輔

李含

張方

閻鼎

索靖

子綝

賈疋

晉書卷六十一

列傳第三十一

周浚

子嵩

謨

從父弟馥

成公簡

苟晞

華軼

劉喬

孫眺

眺子柳

晉書卷六十二

列傳第三十二

劉琨

琨子羣

琨兄輿

輿子胤

祖逖

兄納

晉書卷六十三

列傳第三十三

邵續

李矩

段匹磾

魏浚

浚族子該

郭默

晉書卷六十四

列傳第三十四

武十三王

元四王

簡文三王

晉書卷六十五

列傳第三十五

王導

子悅 恬 洽 珣 劭 劭子謐 蒼

晉書卷六十六

列傳第三十六

劉弘

陶侃

子洪瞻 夏琦 旗斌 稱 範 岱 兄子臻 臻弟輿

晉書卷六十七

列傳第三十七

溫嶠

郗鑿

子愔 愔子超 鑿弟曇 鑿叔父隆

晉書卷六十八

列傳第三十八

顧榮

紀瞻

賀循 楊方

薛兼

晉書卷六十九

列傳第三十九

劉隗 孫波

刁協 子彝 彝子達

戴若思 弟邈

周顥 子閔

晉書卷七十

列傳第四十

應詹

甘卓 鄧騫

卞壺 從父兄敦

劉超

鍾雅

晉書卷七十一

列傳第四十一

孫惠

熊遠

王鑿

陳頴

高崧

晉書卷七十二

列傳第四十二

郭璞

葛洪

晉書卷七十三

列傳第四十三

庾亮 子彬弟

義水

條

翼

晉書卷七十四

列傳第四十四

桓彝

子雲

雲弟

豁子

石虔

石生

石綬

石康

豁弟

石民

石生

晉書卷七十五

列傳第四十五

王湛

子承

承子

述子

坦之

恠

愉子

坦之子

愉

國寶

荀崧

子綰

祖台之

子甯

劉惔

張憑

韓伯

晉書卷七十六

列傳第四十六

王舒

子允之

王廙

弟彬

彬子彪之

王稜

虞潭

孫嘯父

顧眾

張闔

晉書卷七十七

列傳第四十七

陸曄

曄弟

玩子

萬曆二十四年刊

晉書目錄

六

何克

褚爽

蔡謨

諸葛恢

殷浩

顧悅之

蔡裔

晉書卷七十八

列傳第四十八

孔愉

子汪嚴

安國從弟羣

弟祗羣子沉

從子坦

丁潭

張茂

陶回

晉書卷七十九

列傳第四十九

謝尚

謝安

安子琰安兄奕

琰子混奕子玄

晉書卷八十

列傳第五十

安弟萬石兄子朗

萬弟石朗弟子邈

王羲之

子玄之弟操之

凝之獻之

徽之許邁

徽之子植之

晉書卷八十一

列傳第五十一

王遜

蔡豹

羊鑿

劉胤

桓宣

族子伊

朱伺

毛寶

子穆之孫豫

安之宗人德祖

劉遐

鄧嶽子遐

朱序

晉書卷八十二

列傳第五十二

陳壽

王長文

虞傳

司馬彪

王隱

虞預

孫盛

于寶

鄧粲

謝沉

習鑿齒

徐廣

晉書卷八十三

列傳第五十三

顧和

袁瓌

子喬 喬孫崧 瓌弟猷 從祖準

準孫耽 耽子質 質子湛 豹

江道

從弟灌

灌子績

車胤

殷覲

王雅

晉書卷八十四

列傳第五十四

王恭

庾楷

劉牢之 子敬宣

殷仲堪

楊佺期

晉書卷八十五

列傳第五十五

劉毅 兄邁

諸葛長民

何無忌

檀憑之

魏詠之

晉書卷八十六

列傳第五十六

張軌 軌子寔
駿子重華

寔弟茂
華子耀靈

寔子駿
靈父伯祚

靈弟玄觀
觀叔天錫

晉書卷八十七

列傳第五十七

涼武昭王李玄盛 子業

晉書卷八十八

列傳第五十八

孝友

李密

盛彥

夏方

王衷

許孜

庾袞

孫畧

顏含

劉殷

王延

王談

桑虞

何琦

吳達

晉書卷八十九

列傳第五十九

忠義

嵇紹 從子舍

王豹

劉沉

麴允 焦嵩

賈潭

王育

韋忠

辛勉

劉敏元

周該

桓雄

韓階

周崎

易雄

樂道融

虞悝

沈勁

吉悝

王諒

宋矩

車濟

丁穆

辛恭靖

羅企生

張禕

晉書卷九十

列傳第六十

良吏

魯芝

胡威

杜軫

竇允

王宏

曹攄

潘京

范晔

丁紹

喬智明

鄧攸

吳隱之

晉書卷九十一

列傳第六十一

儒林

范平

文立

陳邵

虞喜

劉兆

范毓

徐苗

崔遊

范隆

杜夷

董景道

續咸

徐邈

孔衍

范宣

韋諛

范弘之

王歡

晉書卷九十二

列傳第六十二

文苑

應貞

成公綏

左思

趙至

鄒湛

襄據

褚陶

王沉

張翰

庾闡

曹毗

李充

袁宏

伏滔

羅含

顧愷之

郭澄之

晉書卷九十三

列傳第六十三

外戚

羊琇

王恂弟虔愷

楊文宗

羊玄之

虞豫子胤

庾琛

杜乂

褚裒

何準子澄

王濛子修

王遐

王蘊

褚爽

晉書卷九十四

列傳第六十四

隱逸

孫登

董京

夏統

朱冲

范粲

子喬

魯勝

董養

霍原

郭琦

伍朝

魯褰

汜騰

任旭

郭文

龔壯

孟陋

韓績

譙秀

翟湯

子莊

郭翻

辛謚

劉麟之

索襲

楊軻

公孫鳳

公孫永

張忠

石垣

宋織

郭荷

郭瑀

祁嘉

瞿硎先生

謝敷

戴逵

龔玄之

陶淡

陶潛

晉書卷九十五

列傳第六十五

藝術

萬曆二十四年刊

晉書目錄

三

陳訓

戴洋

韓友

淳于智

步熊

杜不愆

嚴卿

隗炤

卜翊

鮑靚

吳猛

幸靈

佛圖澄

麻襦

單道開

黃泓

索統

孟欽

王嘉

僧涉

郭磨

鳩摩羅什

曇霍

臺產

晉書卷九十六

列傳第六十六

烈女

羊耽妻辛氏

杜有道妻嚴氏

王渾妻鍾氏

鄭袤妻曹氏

愍懷太子妃王氏

鄭休妻石氏

陶侃母湛氏

賈渾妻宗氏

梁緯妻辛氏

許延妻杜氏

虞潭母孫氏

周顓母李氏

張茂妻陸氏

尹虞二女

荀崧小女灌

王凝之妻謝氏

劉臻妻陳氏

皮京妻龍氏

孟昶妻周氏

何無忌母劉氏

劉聰妻劉氏

王廣女

陝婦人

靳康女

韋逞母宋氏

張天錫二妾閻氏薛氏

苻堅妾張氏

竇滔妻蘇氏

苻登妻毛氏

慕容垂妻段氏

段豐妻慕容氏

呂纂妻楊氏

呂紹妻張氏

李玄盛后尹氏

晉書卷九十七

列傳第六十七

四夷

東夷

夫餘 肅慎

馬韓 倭人

辰韓 裨離等十國

西夷

吐谷渾 大宛

焉耆 康居

龜茲 大秦

南蠻

扶南 林邑

北狄

匈奴

晉書卷九十八

列傳第六十八

王敦

沈亮

桓溫

孟嘉

晉書卷九十九

列傳第六十九

桓玄

卞範之

殷仲文

晉書卷一百

列傳第七十

王彌

張昌

陳敏

王如

杜曾

杜弢

王機

祖約

蘇峻

孫恩

盧循

譙縱

載記

晉書卷一百一

載記第一

前趙

劉元海

子和

劉宣

晉書卷一百二

載記第二

前趙

劉聰

子粲

陳元達

晉書卷一百三

載記第三

前趙

劉曜

晉書卷一百四

載記第四

後趙

石勒上

晉書卷一百五

載記第五

後趙

石勒下

子弘

張賓

晉書卷一百六

載記第六

後趙

石季龍上

晉書卷一百七

載記第七

後趙

石季龍下

子世

遵

鑿

冉閔

晉書卷一百八

載記第八

前燕

慕容廆

裴嶷

高瞻

晉書卷一百九

載記第九

前燕

慕容皝

慕容翰

陽裕

晉書卷一百十

載記第十

前燕

慕容儁

韓恒

李產

產子績

晉書卷一百十一

載記第十一

前燕

慕容暉

慕容恪

陽騫

皇甫真

晉書卷一百十二

載記第十二

前秦

苻洪

苻健

苻生

苻雄

王墮

晉書卷一百十三

載記第十三

前秦

苻堅上

晉書卷一百十四

載記第十四

前秦

苻堅下

王猛

苻融

苻朗

晉書卷一百十五

載記第十五

前秦

苻丕

苻登

索泮

徐嵩

晉書卷一百十六

載記第十六

後秦

姚弋仲

姚襄

姚萇

晉書卷一百十七

載記第十七

後秦

姚興上

晉書卷一百十八

載記第十八

後秦

姚興下

尹緯

晉書卷一百十九

載記第十九

後秦

姚泓

晉書卷一百二十

載記第二十

後蜀

李特

李流

李廙

晉書卷一百二十一

載記第二十一

後蜀

李雄

李班

李期

李壽

李勢

晉書卷一百二十二

萬曆二十四年刊

晉書目錄

三

載記第二十二

後涼

呂光

呂纂

呂隆

晉書卷一百二十三

載記第二十三

後燕

慕容垂

晉書卷一百二十四

載記第二十四

後燕

慕容寶

慕容盛

慕容熙

慕容雲

晉書卷一百二十五

載記第二十五

西秦乞伏

北燕馮

乞伏國仁

乞伏軋歸

乞伏熾磐

馮跋馮素弗

晉書卷一百二十六

載記第二十六

南涼

秃髮烏孤

秃髮利鹿孤

秃髮儔檀

晉書卷一百二十七

載記第二十七

南燕

慕容德

晉書卷一百二十八

載記第二十八

南燕

慕容超

晉書卷一百二十九

載記第二十九

北涼

沮渠蒙遜

晉書卷一百三十

載記第三十

赫連勃勃

右晉十二世十五帝一百五十六年

中朝四帝都洛陽五十四年

江左十一帝都建康一百二年

有五涼四燕三秦二趙夏蜀十六國附其書起乙酉盡庚申

晉書目錄終

晉書卷一

帝紀第一

唐太宗文皇帝御撰

皇明承直郎國子監司業臣方從哲等

勅重較刊
皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修
宣帝

宣皇帝諱懿字仲達河內温縣孝敬聖人姓司馬氏其先出自帝高陽之子重黎為夏官祝融歷唐虞夏商世序其職及周以夏官為司馬其後程伯休父周宣王時以世官克平徐方錫以官族因而為氏楚漢間司馬印

爲趙將與諸侯伐秦秦亡立爲殷王都河內漢以其地
爲郡子孫遂家焉自卬八世生征西將軍鈞字叔平鈞
生豫章太守量字公度量生潁川太守儁字元異儁生
京兆尹防字建公帝卽防之第二子也少有奇節聰朗
多大略博學洽聞伏膺儒教漢末大亂常慨然有憂天
下心南郡太守同郡楊俊名知人見帝未弱冠以爲非
常之器尚書清河崔琰與帝兄朗善亦謂朗曰君弟聰
亮明允剛斷英特非予所及也漢建安六年郡舉上計
掾魏武帝爲司空聞而辟之帝知漢運方微不欲屈節
曹氏辭以風痺不能起居魏武使人夜往密刺之帝堅
臥不動及魏武爲丞相又辟爲文學掾勅行者曰若復
盤桓便收之帝懼而就職於是使與太子游處遷黃門
侍郎轉議郎丞相東曹屬尋轉主簿從討張魯言於魏
武曰劉備以詐力虜劉璋蜀人未附而遠爭江陵此機
不可失也今若曜威漢中益州震動進兵臨之勢必瓦
解因此之勢易爲功力聖人不能違時亦不失時矣魏
武曰人苦無足旣得隴右復欲得蜀言竟不從旣而從
討孫權破之軍還權遣使乞降上表稱臣陳說天命魏
武帝曰此兒欲踞吾著爐炭上邪答曰漢運垂終殿下
十分天下而有其九以服事之權之稱臣天人之意也

虞夏殷周不以謙讓者畏天知命也

魏國既建遷太子中庶子每與大謀輒有奇策爲太子所信重與陳羣吳質朱鑠號曰四友遷爲軍司馬言於魏武曰昔箕子陳謀以食爲首今天下不耕者蓋二十餘萬非經國遠籌也雖戎甲未卷自宜且耕且守魏武納之於是務農積穀國用豐贍帝又言荊州刺史胡脩麤暴南鄉太守傅方驕奢竝不可居邊魏武不之察及蜀將關羽圍曹仁於樊于禁等七軍皆沒脩方果降羽而仁圍甚急焉是時漢帝都許昌魏武以爲近賊欲徙河北帝諫曰禁等爲水所沒非戰守之所失於國家大計未有所損而便遷都既示敵以弱又淮沔之人太不安矣孫權劉備外親內疎羽之得意權所不願也可喻權所今倚其後則樊圍自解魏武從之權果遣將呂蒙西襲羽公安拔之羽遂爲蒙所獲魏武以荊州遺黎及屯田在潁川者逼近南寇皆欲徙之帝曰荆楚輕脫易動難安關羽新破諸爲惡者藏竄觀望今徙其善者旣傷其意將令去者不敢復還從之其後諸亡者悉復業及魏武薨於洛陽朝野危懼帝紀綱喪事內外蕭然乃奉梓宮還鄴

魏文帝卽位封河津亭侯轉丞相長史會孫權帥兵西

過朝議以樊襄陽無穀不可以禦寇時曹仁鎮襄陽請
召仁還宛帝曰孫權新破關羽此其欲自結之時也必
不敢爲患襄陽水陸之衝禦寇要害不可棄也言竟不
從仁遂焚棄二城權果不爲寇魏文悔之及魏受漢禪
以帝爲尚書頃之轉督軍御史中丞封安國鄉侯

黃初二年督軍官罷遷侍中尚書右僕射

五年天子南巡觀兵吳疆帝留鎮許昌改封向鄉侯轉
撫軍假節領兵五千加給事中錄尚書事帝固辭天子
曰吾於庶事以夜繼晝無須更寧息此非以爲榮乃分
憂耳

六年天子復大興舟師征吳復命帝居守內鎮百姓外
供軍資臨行詔曰吾深以後事爲念故以委卿曹叅雖
有戰功而蕭何爲重使吾無西顧之憂不亦可乎天子
自廣陵還洛陽詔帝曰吾東撫軍當總西事吾西撫軍
當總東事於是帝留鎮許昌及天子疾篤帝與曹真陳
羣等見於崇華殿之南堂竝受顧命輔政詔太子曰有
聞此三公者慎勿疑之明帝卽位改封舞陽侯及孫權
圍江夏遣其將諸葛瑾張霸并攻襄陽帝督諸軍討權
走之進擊敗瑾斬霸并首級千餘遷驃騎將軍

太和元年六月天子詔帝屯于宛加督荆豫二州諸軍

事初蜀將孟達之降也魏朝遇之甚厚帝以達言行傾
巧不可任驟諫不見聽乃以達領新城太守封侯假節
達於是連吳固蜀潛圖中國蜀相諸葛亮惡其反覆又
慮其爲患達與太守申儀有隙亮欲促其事乃遣郭模
詐降過儀因漏泄其謀達聞其謀漏泄將舉兵帝恐達
速發以書喻之曰將軍昔棄劉備託身國家國家委將
軍以疆場之任任將軍以圖蜀之事可謂心貫白日蜀
人愚智莫不切齒於將軍諸葛亮欲相破惟苦無路耳
模之所言非小事也亮豈輕之而令宣露此殆易知耳
達得書大喜猶與不決帝乃潛軍進討諸將言達與二
賊交相宜觀望而後動帝曰達無信義此其相疑之時
也當及其未定促決之乃倍道兼行八日到其城下吳
蜀各遣其將向西城安橋木闌塞以救達帝分諸將以
距之初達與亮書曰宛去洛八百里去吾一千二百里
聞吾舉事當表上天子此相反覆一月間也則吾城已
固諸軍足辦則吾所在深險司馬公必不自來諸將來
吾無患矣及兵到達又告亮曰吾舉事八日而兵至城
下何其神速也上庸城三面阻水達於城外爲木柵以
自固帝渡水破其柵直造城下八道攻之旬有六日達
甥鄧賢將李輔等開門出降斬達首傳京師俘獲萬餘

人振旅還于宛乃勸農桑禁浮費南土悅附焉初申儀
父在魏與專威疆場輒奉制刻印多所假授達既誅有
自疑心時諸郡守以帝新克捷奉禮來賀皆聽之帝使
人諷儀儀至問承制狀執之歸于京師又徙孟達餘衆
七千餘家于幽州蜀將姚靜鄭他等帥其屬七千餘人
來降時邊郡新附多無戶名魏朝欲加隱實屬帝朝于
京師天子訪之於帝帝對曰賊以密網束下故下棄之
宜弘以大綱則自然安樂又問二虜宜討何者爲先對
曰吳以中國不習水戰故敢散居東關凡攻敵必先
喉而椿其心夏口東關賊之心喉若爲陸軍攻

引權東下爲水戰軍向夏口乘其虛而擊之此神兵從
天而墜破之必矣天子竝然之復命帝屯于宛

四年遷大將軍加大都督假黃鉞與曹真伐蜀帝自西
城斫山開道水陸竝進沂沔而上至于朐臆

上音蠡下
如允反

拔其新豐縣軍次丹口遇雨班師明年諸葛亮寇天水
圍將軍賈嗣魏平於祁山天子曰西方有事非君莫可
付者乃使帝西屯長安都督雍梁二州諸軍事統車騎
將軍張郃後將軍費曜征蜀護軍戴凌雍州刺史郭淮
等討亮張郃勸帝分軍住雍郃爲後鎮帝曰料前軍獨
能當之者將軍言是也若不能當而分爲前後此楚之

三軍所以爲黥布禽也遂進軍險糜亮聞大軍且至乃
自帥衆將芟上邽之麥諸將皆懼帝曰亮慮多決少必
安營自固然後芟麥吾得二日兼行足矣於是卷甲晨
夜赴之亮望塵而遁帝曰吾倍道疲勞此曉兵者之所
貪也亮不敢據渭水此易與耳進次漢陽與亮相遇帝
列陣以待之使將牛金輕騎餌之兵才接而亮退追至
祁山亮屯鹵城據南北二山斷水爲重圍帝攻拔其圍
亮宵遁追擊破之俘斬萬計天子使使者勞軍增封邑
時軍師杜襲督軍薛悌皆言明年麥熟亮必爲寇隴石
無穀宜及冬豫運帝曰亮再出祁山一攻陳倉此句而
反縱其後出不復攻城當求野戰必在隴東不在西也
亮每以糧少爲恨歸必積穀以吾料之非三稔不能動
矣於是表徙冀州農夫佃上邽興京兆天水南安監治
青龍元年穿成國渠築臨晉陂溉田數千頃國以充實
焉
二年亮又帥衆十餘萬出斜谷壘于郿之渭水南原天
子憂之遣征蜀護軍秦朗督步騎二萬受帝節度諸將
欲住渭北以待之帝曰百姓積聚皆在渭南此必爭之
地也遂引軍而濟背水爲壘因謂諸將曰亮若勇者當
出武功依山而東若西上五丈原則諸軍無事矣亮果

上原將北渡渭帝遣將軍周當屯陽遂以餌之數日亮
不動帝曰亮欲爭原而不向陽遂此意可知也遣將軍
胡遵雍州刺史郭淮共備陽遂與亮會于積石臨原而
戰亮不得進還于五丈原會有長星墜亮之壘帝知其
必敗遣奇兵倚亮之後斬五百餘級獲生口千餘降者
六百餘人時朝廷以亮僑軍遠寇利在急戰每命帝持
重以候其變亮數挑戰帝不出因遣帝巾幘婦人之飾
帝怒表請決戰天子不許乃遣骨鯁臣衛尉辛毗杖節
爲軍師以制之後亮復來挑戰帝將出兵以應之毗杖
節立軍門帝乃止初蜀將姜維聞毗來謂亮曰辛毗杖
節而至賊不復出矣亮曰彼本無戰心所以固請者以
示武於其衆耳將在軍君命有所不受苟能制吾豈干
里而請戰邪帝弟孚書問軍事帝復書曰亮志大而不
見機多謀而少決好兵而無權雖提卒十萬已墮吾畫
中破之必矣與之對壘百餘日會亮病卒諸將燒營遁
走百姓奔告帝出兵追之亮長史楊儀反旗鳴鼓若將
距帝者帝以窮寇不之逼於是楊儀結陣而去經日乃
行其營壘觀其遺事獲其旨書糧穀甚衆帝審其必死
曰天下奇才也辛毗以爲尚未可知帝曰軍家所重軍
書密計兵馬糧穀今皆棄之豈有人捐其五藏而可以

生乎宜急追之關中多疾藜帝使軍士二千人著軟材
平底木屐前行疾藜悉著屐然後馬步俱進追到赤岸
乃知亮死審問時百姓爲之諺曰死諸葛走生仲達帝
聞而笑曰吾便料生不便料死故也先是亮使至帝問
曰諸葛公起居何如食可幾米對曰三四升次問政事
曰二十罰已上皆自省覽帝旣而告人曰諸葛孔明其
能久乎竟如其言亮部將楊儀魏延爭權儀斬延并其
衆帝欲乘隙而進有詔不許

三年遷太尉累增封邑蜀將馬岱入寇帝遣將軍牛金
擊走之斬千餘級武都氐王苻雙強端帥其屬六千餘
人來降關東飢帝運長安粟五百萬斛于京師

四年獲白鹿獻之天子曰昔周公旦輔成王有素雉之
貢今君受陝西之任有白鹿之獻豈非忠誠協符千載
同契俾乂邦家以求厥休邪及遼東太守公孫文懿反
徵帝詣京師天子曰此不足以勞軍事欲必克故以相
煩耳君度其行何計對曰棄城預走上計也據遼水以
距大軍次計也坐守襄平此成擒耳天子曰其計將安
出對曰惟明者能深度彼已豫有所棄此非其所及也
今懸軍遠征將謂不能持久必先距遼水而後守此中
下計也天子曰往還幾時對曰往百日還百日攻百日

以六十日爲休息一年足矣是時大脩宮室加之以軍
旅百姓飢弊帝將卽戎乃諫曰昔周公營洛邑蕭何造
未央今宮室未備臣之責也然自河以北百姓困窮外
內有役勢不並興宜假絕內務以救時急

景初二年帥牛金胡遵等步騎四萬發自京都車駕送
出西明門詔弟孚子師送過溫賜以穀帛牛酒勅郡守
典農已下皆往會焉見父老故舊讌飲累日帝歎息悵
然有感爲歌曰天地開闢日月重光遭遇際會畢力遐
方將埽羣穢還過故鄉肅清萬里總齊八荒告成歸老
待罪舞陽遂進師經孤竹越碣石次于遼水文懿果遣
步騎數萬阻遼隧堅壁而守南北六七十里以距帝帝
盛兵多張旗幟出其南賊盡銳赴之乃泛舟潛濟以出
其北與賊營相逼沉舟焚梁傍遼水作長圍棄賊而向
襄平諸將言曰不攻賊而作圍非所以示衆也帝曰賊
堅營高壘欲以老吾兵也攻之正入其計此王邑所以
恥過昆陽也古人曰敵雖高壘不得不與我戰者攻其
所必救也賊大衆在此則巢窟虛矣我直指襄平則人
懷內懼懼而求戰破之必矣遂整陣而過賊見兵出其
後果邀之帝謂諸將曰所以不攻其營正欲致此不可
失也乃縱兵逆擊大破之三戰皆捷賊保襄平進軍圍

之初文懿聞魏師之出也請救於孫權權亦出兵遙爲之聲援遺文懿書曰司馬公善用兵變化若神所向無前深爲弟憂之會霖潦八水平地數尺三軍恐欲移營帝令軍中敢有言徙者斬都督令史張靜犯令斬之軍中乃定賊恃水樵牧自若諸將欲取之皆不聽司馬陳瑋曰昔攻上庸八部竝進晝夜不息故能一旬之半拔堅城斬孟達今者遠來而更安緩愚竊惑焉帝曰孟達衆少而食支一年將士四倍於達而糧不淹月以一月曷一年安可不速以四擊一止令半解猶當爲之是以不計死傷與糧競也今賊衆我寡賊飢我飽水雨乃爾功力不設雖當促之亦何所爲自發京師不憂賊攻但恐賊走今賊糧垂盡而圍落未合掠其牛馬抄其樵采此故驅之走也夫兵者詭道善因事變賊憑衆恃雨故雖飢困未肯束手當示無能以安之取小利以驚之非計也朝廷聞師遇雨咸請召還天子曰司馬公臨危制變計日禽之矣旣而雨止遂合圍起土山地道楯櫓鉤橦發矢石雨下晝夜攻之時有長星色白有芒鬣自襄平城西南流于東北墜于梁水城中震懼文懿大懼乃使其所署相國王建御史大夫柳甫乞降請解圍面縛不許執建等皆斬之檄告文懿曰昔楚鄭列國而鄭伯

猶肉袒牽羊而迎之孤爲王人位則上公而建等欲孤
解圍退舍豈楚鄭之謂邪二人老耄必傳言失旨已相
爲斬之若意有未已可便遣年少有明決者來文懿復
遣侍中衛演乞尅日送任帝謂演曰軍事大要有五能
戰當戰不能戰當守不能守當走餘二事惟有降與死
耳汝不肯面縛此爲決就死也不須送任文懿攻南圍
突出帝縱兵擊敗之斬于梁水之上星墜之所旣入城
立兩標以別新舊焉男子年十五已上七千餘人皆殺
之以爲京觀僞公卿已下皆伏誅戮其將軍畢盛等二
千餘人收戶四萬口三十餘萬初文懿篡其叔父恭位
而囚之及將反將軍綸直賈範等苦諫文懿皆殺之帝
乃釋恭之囚封直等之墓顯其遺嗣今日古之伐國誅
其鯨鯢而已諸爲文懿所誣誤者皆原之中國人欲還
舊鄉恣聽之時有兵士寒凍乞襦帝弗之與或曰幸多
故襦可以賜之帝曰襦者官物人臣無私施也乃奏軍
人年六十已上者罷遣千餘人將吏從軍死亡者致喪
還家遂班師天子遣使者勞軍于薊增封食昆陽并前
二縣初帝至襄平夢天子枕其膝曰視吾面俛視有異
於常心惡之先是詔帝便道鎮關中及次白屋有詔召
帝三日之間詔書五至手詔日間側息望到到便直排

閣入視吾面帝大遽乃乘追鋒車晝夜兼行自白屋四百餘里一宿而至引入嘉福殿臥內升御床帝流涕問疾天子執帝手曰以後事相託死乃復可忍吾忍死待君得相見無所復恨矣與大將軍曹爽並受遺詔輔少主及齊王卽帝位遷侍中持節都督中外諸軍錄尚書事與爽各統兵三千人共執朝政更直殿中乘輿入殿爽欲使尚書奏事先由已乃言於天子徙帝爲大司馬朝議以爲前後大司馬累薨於位乃以帝爲太傅入殿不趨贊拜不名劔履上殿如漢蕭何故事嫁娶喪葬取給於官以世子師爲散騎常侍子弟三人爲列侯四人爲騎都尉帝固讓子弟官不受

魏正始元年春正月東倭重譯納貢焉耆危須諸國弱水以南鮮卑名王皆遣使來獻天子歸美宰輔又增帝封邑初魏明帝好修宮室制度靡麗百姓苦之帝自遼東還役者猶萬餘人雕玩之物動以萬計至是皆奏罷之節用務農天下欣賴焉

二年夏五月吳將全琮寇芍陂朱然孫倫圍樊城諸葛瑾步騭掠祖中帝請自討之議者咸言賊遠來圍樊不可卒拔挫於堅城之下有自破之勢宜長策以御之帝曰邊城受敵而安坐廟堂疆場騷動衆心疑惑是社稷

晉書卷一 帝紀 三
之大憂也六月乃督諸軍南征車駕送出津陽門帝以南方暑濕不宜持久使輕騎挑之然不敢動於是休戰士簡精銳募先登申號令示必攻之勢吳軍夜遁走追至三州口斬獲萬餘人收其舟船軍資而還天子遣侍中常侍勞軍于宛秋七月增封食郾臨潁并前四縣邑萬戶子弟十一人皆爲列侯帝勲德日盛而謙恭愈甚以太常常林鄉邑舊齒見之每拜恒戒子弟曰盛滿者道家之所忌四時猶有推移吾何德以堪之損之又損之庶可以免乎

三年春天子追封諡皇考京兆尹爲舞陽成侯三月奏

穿廣漕渠引河入汴漑東南諸陂始大佃於淮北先是吳遣將諸葛恪屯皖邊鄙苦之帝欲自擊恪議者多以賊據堅城積穀欲引致官兵今懸軍遠攻其救必至進退不易未見其便帝曰賊之所長者水也今攻其城以觀其變若用其所長棄城奔走此爲廟勝也若敢固守湖水冬淺船不得行勢必棄水相救由其所短亦吾利也

四年秋九月帝督諸軍擊諸葛恪車駕送出津陽門軍次于舒恪焚燒積聚棄城而遁帝以滅賊之要在於積穀乃大興屯守廣開淮陽百尺二渠又修諸陂於潁之

南北萬餘頃自是淮北倉庾相望壽陽至于京師農官屯兵連屬焉

五年春正月帝至自淮南天子使持節勞軍尚書鄧颺李勝等欲令曹爽建立功名勸使伐蜀帝止之不可爽果無功而還

六年秋八月曹爽毀中壘中堅營以兵屬其弟中領軍羲帝以先帝舊制禁之不可冬十二月天子詔帝朝會乘輿升殿

七年春正月吳寇想中夷夏萬餘家避寇北度沔帝以沔南近賊若百姓奔還必復致寇宜權留之曹爽曰今不能修守沔南而留百姓非長策也帝曰不然凡物致之安地則安危地則危故兵書曰成敗形也安危勢也形勢御衆之要不可以不審設令賊以二萬人斷沔水三萬人與沔南諸軍相持萬人陸梁祖中將何以救之爽不從卒令還南賊果襲破祖中所失萬計

八年夏四月夫人張氏薨曹爽用何晏鄧颺丁謚之謀遷太后於永寧宮專擅朝政兄弟竝與禁兵多樹親黨屢改制度帝不能禁於是與爽有隙五月帝稱疾不與政事時人爲之謠曰何鄧丁亂京城

九年春三月黃門張當私出掖庭才人石英等十二人

與曹爽爲伎人爽晏謂帝疾篤遂有無君之心與當密謀圖危社稷期有日矣帝亦潛爲之備爽之徒屬亦頗疑帝會河南尹李勝將蒞荊州來候帝帝詐疾篤使兩婢侍持衣衣落指口言渴婢進粥帝不持杯飲粥皆流出霑胷勝曰衆情謂明公舊風發動何意尊體乃爾帝使聲氣纔屬說年老枕疾死在旦夕君當屈并州并州近胡善爲之備恐不復相見以子師昭兄弟爲託勝曰當還忝本州非并州帝乃錯亂其辭曰君方到并州勝復曰當忝荊州帝曰年老意荒不解君言今還爲本州盛德壯烈好建功勳勝退告爽曰司馬公尸居餘氣形神已离不足慮矣他日又言曰太傅不可復濟令人愴然故爽等不復設備

嘉平元年春正月甲午天子謁高平陵爽兄弟皆從是日太白襲月帝於是奏未寧太后廢爽兄弟時景弟爲中護軍將兵屯司馬門帝列陣闕下經爽門爽帳下督嚴世上樓引弩將射帝孫謙止之曰事未可知三注三止皆引其肘不得發大司農桓範出赴爽蔣濟言於帝曰智囊往矣帝曰爽與範內疎而智不及駑馬戀短豆必不能用也於是假司徒高柔節行大將軍事領爽營謂柔曰君爲周勃矣命太僕王觀行中領軍攝義營帝

親帥大尉蔣濟等勒兵出迎天子屯于洛水浮橋上奏
曰先帝詔陛下秦王及臣升于御床握臣臂曰深以後
事爲念今大將軍爽背棄顧命敗亂國典內則僭擬外
專威權羣臣要職皆置所親宿衛舊人竝見斥黜根據
槃牙縱恣日甚又以黃門張當爲都監專共交關伺候
神器天下洶洶人懷危懼陛下便爲寄坐豈得久安此
非先帝詔陛下及臣升御床之本意也臣雖朽邁敢忘
前言昔趙高極意秦是以亡呂霍早斷漢祚末延此乃
陛下之殷鑒臣授命之秋也公卿羣臣皆以爽有無君
之心兄弟不宜典兵宿衛奏皇太后皇太后勅如奏施
行臣輒勅主者及黃門今罷爽兼訓吏兵各以本官候
就第若稽留車駕以軍法從事臣輒力疾將兵詣洛水
浮橋伺察非常爽不通奏留車駕宿伊水南伐樹爲鹿
角發屯兵數千人以守桓範果勸爽奉天子幸許昌移
檄徵天下兵爽不能用而夜遣侍中許允尚書陳泰詣
帝觀望風旨帝數其過失事止免官泰還以報爽勸之
通奏帝又遣爽所信殿中校尉尹大目諭爽指洛水爲
誓爽意信之桓範等援引古今諫說萬端終不能從乃
曰司馬公正當欲奪吾權耳吾得以侯還第不失爲富
家翁範拊膺曰坐卿滅吾族矣遂通帝奏旣而有司劾

黃門張當并發爽與何晏等反事乃收爽兄弟及其黨
與何晏丁謚鄧颺畢軌李勝桓範等誅之蔣濟曰曹真
之勲不可以不祀帝不聽初爽司馬魯芝主簿楊綜斬
關奔爽及爽之將歸罪也芝綜泣諫曰公居伊周之任
挾天子杖天威孰敢不從舍此而欲就東市豈不痛哉
有司奏收芝綜科罪帝赦之曰以勸事君者二月天子
以帝爲丞相增封潁川之繁昌鄆陵新汲父城并前八
縣邑二萬戶奏事不名固讓丞相冬十二月加九錫之
禮朝會不拜固讓九錫

二年春正月天子命帝立廟于洛陽置左右長史增掾

屬舍人滿十人歲舉掾屬任御史秀才各一人增官屬
百人鼓吹十四人封子彤平樂亭侯倫安樂亭侯帝以
久疾不任朝請每有大事天子親幸第以諮訪焉兗州
刺史令狐愚太尉王凌貳於帝謀立楚王彪

三年春正月王凌詐言吳人塞涂水請發兵以討之帝
潛知其計不聽夏四月帝自帥中軍汎舟沿流九日而
到甘城凌計無所出乃迎于武丘面縛水次曰凌若有
罪公當折簡召凌何苦自來邪帝曰以君非折簡之客
故耳卽以凌歸于京師道經賈逵廟凌呼曰賈梁道王
凌是大魏之忠臣惟爾有神知之至項仰鳩而死收其

餘黨皆夷三族并殺彪悉錄魏諸王公置于鄴命有司
監察不得交關天子遣侍中韋誕持節勞軍于五池帝
至自甘城天子又使兼大鴻臚大僕庾嶷持節策命帝
爲相國封安平郡公孫及兄子各一人爲列侯前後食
邑五萬戶侯者十九人固讓相國郡公不受六月帝寢
疾夢賈逵王凌爲祟甚惡之秋八月戊寅崩于京師時
年七十二天子素服臨弔喪葬威儀依霍光故事追贈
相國郡公弟孚表陳先志辭郡公及輜輶車九月庚申
葬于河陰諡曰文貞後改諡文宣先是預作終制於首
陽山爲土藏不墳不樹作顧命三篇斂以時服不設明
器後終者不得合葬一如遺命晉國初建追尊曰宣王
武帝受禪上尊號曰宣皇帝陵曰高原廟稱高祖帝內
忌而外寬猜忌多權變魏武察帝有雄豪志聞有狼顧
相欲驗之乃召使前行令反顧面正向後而身不動又
嘗夢三馬同食一槽甚惡焉因謂太子丕曰司馬懿非
人臣也必預汝家事太子素與帝善每相全佑故免帝
於是勤於吏職夜以忘寢至於芻牧之間悉皆臨履由
是魏武意遂安及平公孫文懿大行殺戮誅曹爽之際
支黨皆夷及三族男女無少長姑姊妹女子之適人者
皆殺之旣而竟遷魏鼎云明帝時王導侍坐帝問前世

所以得天下導乃陳帝創業之始及文帝末高貴鄉公
事明帝以面覆牀曰若如公言晉祚復安得長遠迹其
猜忍蓋有符於狼顧也

制曰夫天地之大黎元爲本邦國之貴元首爲先治亂
無常興亡有運是故五帝之上居萬乘以爲憂三王已
來處其憂而爲樂競智力爭利害大小相吞強弱相襲
遠乎魏室三方鼎峙干戈不息氣霧交飛宣皇以天挺
之姿應期佐命文以纘治武以稜威用人如在已求賢
若不及情深阻而莫測性寬綽而能容和光同塵與時
舒卷戢鱗潛翼思屬風雲飾忠於已詐之心延安於將
危之命觀其雄略內斷英猷外決殄公孫於百日擒孟
達於盈旬自以兵動若神謀無再計矣旣而擁衆西舉
與諸葛相持抑其甲兵本無鬪志遺其巾櫛方發憤心
杖節當門雄喙頓屈請戰千里詐欲示威且秦蜀之人
勇懦非敵夷阻之路勞逸不同以此爭功其利可見而
返閉軍固壘莫敢爭鋒生怯實而未前死疑虛而猶遁
良將之道失在斯乎文帝之世輔翼權重許昌同蕭何
之委崇華甚霍光之寄當謂竭誠盡節伊傅可齊及明
帝將終棟梁是屬受遺二主佐命三朝旣承忍死之託
曾無殉生之報天子在外內起甲兵陵土未乾遽相誅

戮貞臣之體寧若此乎盡善之方以斯爲惑夫征討之
策豈東智而西愚輔佐之心何前忠而後亂故晉明掩
面恥欺僞以成功石勒肆言笑姦回以定業古人有云
積善三年知之者少爲惡一日聞於天下可不謂然乎
雖自隱過當年而終見嗤後代亦猶竊鍾掩耳以衆人
爲不聞銳意盜金謂市中爲莫覩故知貪於近者則遺
遠溺於利者則傷名若不損己以益人則當禍人而福
己順理而舉易爲力背時而動難爲功况以未成之晉
基逼有餘之魏祚雖復道格區宇德被蒼生而天未啓
時寶位猶阻非可以智競不可以力爭雖則慶流後昆
而身終於北面矣

晉書卷一

帝紀第一

晉書卷二

帝紀第二


唐太宗文皇帝御撰

皇明承直郎國子監司業臣方從哲等

勅重較刊
皇明朝列大夫國子監祭酒臣吳士元
承德郎司業仍加俸一級臣黃錦等奉
旨重修

景帝

景皇帝諱師字子元宣帝長子也雅有風彩沉毅多大略少流美譽與夏侯玄何晏齊名晏常稱曰惟幾也能成天下之務司馬子元是也魏景初中拜散騎常侍累遷中護軍為選用之法舉不越功吏無私焉宣穆皇帝



崩居喪以至孝聞宣帝之將誅曹爽深謀祕策獨與帝
潛畫文帝弗之知也將發夕乃告之既而使人覘之帝
寢如常而文帝不能安席晨會兵司馬門鎮靜內外置
陣甚整宣帝曰此子竟可也初帝陰養死士三千散在
人間至是一朝而集衆莫知所出也事平以功封長平
鄉侯食邑千戶尋加衛將軍及宣帝薨議者咸云伊尹
既卒伊陟嗣事天子命帝以撫軍大將軍輔政

魏嘉平四年春正月遷大將軍加侍中持節都督中外
諸軍錄尚書事命百官舉賢才明少長卹窮獨理廢滯
諸葛誕母丘儉王昶陳泰胡遵都督四方王基州泰鄧
艾石苞典州郡盧毓李豐掌選舉傅叡虞松叅計謀鍾
會夏侯玄王肅陳本孟康趙鄴張緄預朝議四海傾注
朝野肅然或有請改易制度者帝曰不識不知順帝之
則詩人之美也三祖典制所宜遵奉自非軍事不得妄
有改革

五年夏五月吳太傅諸葛恪圍新城朝議慮其分兵以
寇淮泗欲戍諸水口帝曰諸葛恪新得政於吳欲徼一
時之利并兵合肥以冀萬一不暇復爲青徐患也且水
口非一多戍則用兵衆少戍則不足以禦寇恪果并力
合肥卒如所度帝於是使鎮東將軍母丘儉揚州刺史

文欽等距之儉欽請戰帝曰恪卷甲深入投兵死地其鋒未易當且新城小而固攻之未可拔遂命諸將高壘以弊之相持數月恪攻城力屈死傷太半乃勅欽督銳卒趣合榆要其歸路儉帥諸將以爲後繼恪懼而遁欽逆擊大破之斬首萬餘級

正元元年春正月天子與中書令李豐后父光祿大夫張緝黃門監蘇鑠未寧署令樂敦冗從僕射劉寶賢等謀以太常夏侯玄代帝輔政帝密知之使舍人王美以車迎豐豐見迫隨美而至帝數之豐知禍及因肆惡言帝怒遣勇士以刀鏢築殺之遂捕玄緝等皆夷三族三月

乃諷天子廢皇后張氏因下詔曰姦臣李豐等靖謫庸回陰構凶慝大將軍糾虔天刑致之誅辟周勃之克呂氏霍光之擒上官曷以過之其增邑九千戶并前四萬帝讓不受天子以玄緝之誅深不自安而帝亦慮難作潛謀廢立乃密諷魏永寧太后秋九月甲戌太后下令曰皇帝春秋已長不親萬機耽淫內寵沉嫚女德日近倡優縱其醜虐迎六宮家人留止內房毀人倫之敘亂男女之節又爲羣小所迫將危社稷不可承奉宗廟帝召羣臣會議流涕曰太后令如是諸君其如王室何咸曰伊尹放太甲以寧殷霍光廢昌邑以安漢權定社

稷以清四海二代之於古明公當之於今今日之事
惟命是從帝曰諸君見望者重安敢避之乃與羣公卿
士共奏太后曰臣聞天子者所以濟育羣生永安萬國
皇帝春秋已長未親萬機日使小優郭懷袁信等裸袒
淫戲又於廣望觀下作遼東妖婦道路行人莫不掩目
清商令狐景諫帝帝燒鐵炙之太后遭合陽君喪帝
嬉樂自若清商丞龐熙諫帝帝勿聽太后還北宮殺張
美人帝甚恚望熙諫帝怒復以彈彈熙每文書入帝不
省視太后令帝在式乾殿講學帝又不從不可以承天
序臣請依奏霍光故事收皇帝璽綬以齊王歸藩奏可
於是有司以太牢策告宗廟土就乘輿副車羣臣從至
西掖門帝泣曰先臣受歷世外遇先帝臨崩託以遺詔
臣復忝重任不能獻可替否羣公卿士遠惟舊典爲社
稷深計寧負聖躬使宗廟血食於是使使者持節衛送
舍河內之重門誅郭懷袁信等是日與羣臣議所立帝
曰方今宇宙未清二虜爭衡四海之主惟在賢哲彭城
王據太祖之子以賢則仁聖明允以年則皇室之長天
位至重不得其才不足以寧濟六合乃與羣公奏太后
太后以彭城王先帝諸父於昭穆之序爲不次則烈祖
之世永無承嗣東海定王明帝之弟欲立其子高貴鄉

公髦帝固爭不獲乃從太后令遣使迎高貴鄉公於元
城而立之改元曰正元天子受璽墮舉趾高帝聞而憂
之及將大會帝訓於天子曰夫聖王重始正本敬初古
人所慎也明當大會萬衆瞻穆穆之容公卿聽玉振之
音詩云示人不佻是則是效易曰出其言善則千里之
外應之雖禮儀周備猶宜加之以祗恪以副四海顛顛
式仰癸巳天子詔曰朕聞創業之君必須股肱之臣守
文之主亦賴匡佐之輔是故文武以呂召彰受命之功
宣王倚山甫享中興之業大將軍世載明德應期作輔
遭天降險帝室多難齊王蒞政不趨率典公履義執忠
以寧區夏式是百辟總齊庶事內推寇虐外靜姦宄日
昃憂勤劬勞夙夜德聲光于上下勳烈施于四方深惟
大議首建明策權定社稷援立朕躬宗廟獲安億兆慶
賴伊摯之保又殷邦公旦之綏寧周室茂以尚焉朕甚
嘉之夫德茂者位尊庸大者祿厚古今之通義也其登
位相國增邑九千并前四萬戶進號大都督假黃鉞入
朝不趨奏事不名劔履上殿賜錢五百萬帛五千匹以
彰元勳帝固辭相國又上書訓于天子曰荆山之璞雖
美不琢不成其實顏冉之才雖茂不學不弘其量仲尼
有云予非生而知之者好古敏以求之者也仰觀黃軒

五代之主莫不有所稟則顓頊受學於綠圖高辛問道於柏招逮至周成且望作輔故能離經辯志安道樂業夫然故君道明於上兆庶順於下刑措之隆實由於此宜遵先王下問之義使講誦之業屢聞於聽典謨之言日陳於側也時天子頗修華飾帝又諫曰履端初政宜崇玄樸並敬納焉十一月有白氣經天

二年春正月有彗星見于吳楚之分西北竟天鎮東大將軍毋丘儉揚州刺史文欽舉兵作亂矯太后令移檄郡國爲壇盟于西門之外各遣子四人質于吳以請救二月儉欽帥衆六萬渡淮而西帝會公卿謀征討計朝議多謂可遣諸將擊之王肅及尚書傅叡中書侍郎鍾會勸帝自行戊午帝統中軍步騎十餘萬以征之倍道兼行召三方兵大會于陳許之郊甲申次于灑橋儉將史招李續相次來降儉欽移入項城帝遣荊州刺史王基進據南頓以逼儉帝深壁高壘以待東軍之集諸將請進軍攻其城帝曰諸君得其一未知其二淮南將士本無反志且儉欽欲蹈縱橫之迹習儀秦之說謂遠近必應而事起之日淮北不從史招李續前後瓦解內事外叛自知必敗困獸思鬪速戰更合其志雖云必克傷人亦多且儉等欺誑將士詭變萬端小與持久詐情自

露此不戰而克之也乃遣諸葛誕督豫州諸軍自安風
向壽春征東將軍胡遵督青徐諸軍出譙宋之間絕其
歸路帝屯汝陽遣兗州刺史鄧艾督太山諸軍進屯樂
嘉示弱以誘之欽進軍將攻艾帝潛軍銜枚徑造樂嘉
與欽相遇欽子鴛年十八勇冠三軍謂欽曰及其未定
請登城鼓譟擊之可破也既謀而行三譟而欽不能應
鴛退相與引而東帝謂諸將曰欽走矣命發銳軍以追
之諸將皆曰欽舊將鴛少而銳引軍內入未有失利必
不走也帝曰一鼓作氣再而衰三而竭鴛三鼓欽不應
其勢已屈不走何待欽將遁鴛曰不先折其勢不得去
也乃與驍騎十餘摧鋒陷陣所向皆披靡遂引去帝遣
左長史司馬璉督驍騎八千翼而追之使將軍樂綝等
督步兵繼其後比至沙陽頻陷欽陣弩矢雨下欽蒙楯
而馳大破其軍衆皆投戈而降欽父子與麾下走保項
儉聞欽敗棄衆宵遁淮南安風津都尉追儉斬之傳首
京都欽遂奔吳淮南平初帝目有瘤疾使鑿割之鴛之
來攻也驚而目出懼六軍之恐蒙之以被痛甚嚙被敗
而左右莫知焉閏月疾篤使文帝總統諸軍辛亥崩于
許昌時年四十八二月帝之喪至自許昌天子素服臨
弔詔曰公有濟世寧國之勳尅定禍亂之功重之以死

王事宜加殊禮其令公卿議制有司議以爲忠安社稷
功濟宇內宜依霍光故事追加大司馬之號以冠軍大
將軍增邑五萬戶諡曰武公文帝表讓曰臣亡父不敢
受丞相相國九命之禮亡兄不敢受相國之位誠以太
祖常所階歷也今諡與二祖同必所祇懼昔蕭何張良
霍光咸有匡佐之功何諡文終良諡文成光諡宣成必
以文武爲諡請依何等就加詔許之諡曰忠武晉國旣
建追尊曰景王武帝受禪上尊號曰景皇帝陵曰峻平

廟稱世宗

文帝

文皇帝諱昭字子上景帝之母弟也魏景初二年封新
城鄉侯正始初爲洛陽典農中郎將值魏明奢侈之後
帝蠲除苛碎不奪農時百姓大悅轉散騎常侍大將軍
曹爽之伐蜀也以帝爲征蜀將軍副夏侯玄出駱谷次
于興勢蜀將王林夜襲帝營帝堅臥不動林退帝謂玄
曰費禕以據險距守進不獲戰攻之不可宜亟旋軍以
爲後旨爽等引旋禕果馳兵趣三嶺爭險乃得過遂還
拜議郎及誅曹爽帥衆衛二宮以功增邑千戶蜀將姜
維之寇隴右也征西將軍郭淮自長安距之進帝位安
西將軍持節屯關中爲諸軍節度淮攻維別將句安於

麴父而不決帝乃進據長城南趣駱谷以疑之維懼還保南鄭安軍絕援帥衆來降轉安東將軍持節鎮許昌及大軍討王凌帝督淮北諸軍事帥師會于項增邑三百戶假金印紫綬尋進號都督統征東將軍胡遵鎮東將軍諸葛誕伐吳戰于東關二軍敗績坐失侯蜀將姜維又寇隴右揚聲欲攻狄道以帝行征西將軍次長安雍州刺史陳泰欲先賊據狄道帝曰姜維攻羌收其質任聚穀作邸閣訖而復轉行至此正欲了塞外諸羌爲後年之資耳若實向狄道安肯宣露令外人知今揚聲言出此欲歸也維果燒營而去會新平羌胡叛帝擊破之遂耀兵靈州北虜震讟以者悉降以功復封新城鄉侯高貴鄉公之立也以叅定策進封高都侯增封二千戶母丘儉文欽之亂大軍東征帝兼中領軍留鎮洛陽及景帝疾篤帝自京都省疾拜衛將軍景帝崩天子命帝鎮許昌尚書傅嘏帥六軍還京師帝用嘏及鍾會策自帥軍而還至洛陽進位大將軍加侍中都督中外諸軍錄尚書事輔政劔履上殿帝固辭不受

甘露元年春正月加大都督奏事不名夏六月進封高都公地方七百里加之九錫假谷鉞進號大都督劔履上殿又固辭不受秋八月庚申加假黃鉞增封三縣

二年夏五月辛未鎮東大將軍謝萬葛誕殺揚州刺史樂
緄以淮南作亂遣子靚爲質於吳天以請救議者請速伐
之帝曰誕以母丘儉輕疾傾覆今必外連吳寇此爲變
大而遲吾當與四方同力以全勝制之乃表曰昔黥布
叛逆漢祖親征隗囂違戾光武四伐烈祖明皇帝乘輿
仍出皆所以奮揚赫斯震耀威武也陛下宜暫臨戎使
將士得憑天威今諸軍可五十萬以衆擊寡蔑不尅矣
秋七月奉天子及皇太后東征徵兵青徐荆豫分取關
中遊軍皆會淮北師次于項假廷尉何植節使淮南宣
慰將士申明逆順示以誅賞甲戌帝進軍丘頭吳使文

欽唐咨全端全悻等二萬餘人來救誕諸將逆擊不能
禦將軍李廣臨訖不進泰山太守常時稱疾不出竝斬
之以徇八月吳將朱異帥兵萬餘人留輜重於都陸輕
兵至黎漿監軍石苞兗州刺史州泰禦之異退泰山太
守胡烈以奇兵襲都陸焚其糧運苞泰復進擊異大破
之異之餘卒餒甚食葛葉而遁吳人殺異帝曰異不得
至壽春非其罪也而吳人殺之適以謝壽春而堅誕意
使其猶望救耳若其不爾彼當突圍決一旦之命或謂
大軍不能久省食減口冀有他變料賊之情不出此三
者今當多方以亂之備其越逸此勝計也因命合圍分

晉書卷三十一 帝紀十一
遣羸疾就穀淮北廩軍士大豆人三升欽聞之果喜帝
愈羸形以示之多縱一及間揚言吳救方至誕等益寬恣
食俄而城中乏糧石苞王基竝請攻之帝曰誕之逆謀
非一朝一夕也聚糧六元守外結吳人自謂足據淮南欽
旣同惡相濟必不便走今若急攻之損游軍之力外寇
卒至表裏受敵此危道也今三叛相聚於孤城之中天
其或者將使同戮吾豈能以長策縻之但堅守三面若賊
陸道而來軍糧必少吾可以游兵輕騎絕其轉輸可不戰
而破外賊外賊破欽守必成擒矣全懌母孫權女也得
罪於吳全端兄子禕及儀奉其母來奔儀兄靜時在壽

春州會計作禕儀書以譎靜靜兄弟五人帥其衆來
降城中大駭

三年春正月壬寅誕欽等出攻長圍諸軍逆擊走之初
誕欽內不相協及至窮蹙轉相疑貳會欽計事與誕忤
誕手刃殺欽欽子鴛攻誕不克踰城降以爲將軍封侯
使鴛巡城而呼帝見城上持弓者不發謂諸將曰可攻
矣二月乙酉攻而拔之斬誕夷三族吳將唐咨孫曼孫
彌徐韶等帥其屬皆降表加爵位廩其餒疾或言吳兵
必不爲用請坑之帝曰就令亡還適見中國之弘耳於
是徙之三河夏四月歸于京師魏帝命改丘頭曰武丘

以旌武功五月天子以并州之太原上黨西河樂平新興鴈門司州之河東平陽八郡地方七百里封帝爲晉公加九錫進位相國晉國置官司焉九讓乃止於是增邑萬戶食三縣諸子之無爵者皆封列侯秋七月奏錄先世名臣元功大勳之子孫隨才敘用

四年夏六月分荊州置二都督王基鎮新野州秦鎮襄陽使石苞都督揚州陳騫都督豫州鍾毓都督徐州宋鈞監青州諸軍事

景元元年夏四月天子復命帝爵秩如前又讓不受天子旣以帝三世宰輔政非已出情不能安又慮廢辱將臨軒召百寮而行放黜五月戊子夜使冗從僕射李昭等發甲於陵雲臺召侍中王沉散騎常侍王業尚書王經出懷中黃素詔示之戒嚴俟旦沉業馳告于帝帝召護軍賈充等爲之備天子知事泄帥左右攻相府稱有所討敢有動者族誅相府兵將止不敢戰賈充叱諸將曰公畜養汝輩正謂今日耳太子舍人成濟抽戈犯蹕刺之刃出於背天子崩于車中帝召百寮謀其故僕射陳泰不至帝遣其舅荀顗輿致之延于曲室謂曰玄伯天下其如我何泰曰惟腰斬賈充微以謝天下帝曰卿更思其次泰曰但見其上不見其次於是歸罪成濟而

斬之太后令曰昔漢昌邑王以罪廢爲庶人此兒亦宜以庶人禮葬之使外內咸知其所行也殺尚書王經貳於我也庚寅帝奏曰故高貴鄉公帥從駕人兵拔刃鳴鼓向臣所臣懼兵刃相接卽勅將士不得有所傷害違令者以軍法從事騎督成倅弟太子舍人濟入兵陣傷公至隕臣聞人臣之節有死無貳事上之義不敢逃難前者變故卒至禍同發機誠欲委身守死惟命所裁然惟本謀乃欲上危皇太后傾覆宗廟臣忝當元輔義在安國卽駱驛申勅不得迫近輿輦而濟妄入陣間以致天變哀怛痛恨五內世世裂濟干國亂紀罪不容誅輒收濟家屬付廷尉太后從之夷濟三族與公卿議立燕王宇之子常道鄉公璜爲帝六月改元景辰天子進帝爲相國封晉公增十郡加九錫如初羣從子弟未侯者封亭侯賜錢千萬帛萬匹固讓乃止冬十一月吳吉陽督蕭慎以書詣鎮東將軍石苞僞降求迎帝知其詐也使苞外示迎之而內爲之備

二年秋八月甲寅天子使太尉高柔授帝相國印綬司空鄭冲致晉公茅土九錫固辭

三年夏四月蕭慎來獻楛矢石弩弓甲貂皮等天子命歸於大將軍府

四年春二月丁丑天子復命帝如前又固讓三月詔大將軍府增置司馬一人從事中郎二人舍人十人夏帝將伐蜀乃謀衆曰自定壽春已來息役六年治兵繕甲以擬二虜略計取吳作戰船通水道當用千餘萬功此十萬人百數十日事也又南土下溼必生疾疫今宜先取蜀三年之後因巴蜀順流之勢水陸並進此滅虞定虜吞韓并魏之勢也計蜀戰士九萬居守成都及備他郡不下四萬然則餘衆不過五萬今絆姜維於沓中使不得東顧直指駱谷出其空虛之地以襲漢中彼若嬰城守險兵勢必敗首尾離絕舉大衆以屠城散銳卒以略野劔閣不暇守險關頭不能自存以劉禪之闇而邊城外破士女內震其亡可知也征西將軍鄧艾以爲未有曩屢陳異議帝患之使主簿師纂爲艾司馬以喻之艾乃奉命於是徵四方之兵十八萬使鄧艾自狄道攻姜維於沓中雍州刺史諸葛緒自祁山軍于武街絕維歸路鎮西將軍鍾會帥前將軍李輔征蜀護軍胡烈等自駱谷襲漢中秋八月軍發洛陽大賚將士陳師誓衆將軍鄧敦謂蜀未可討帝斬以徇九月又使天水太守王頌攻維營隴西太守牽弘邀其前金城太守楊欣趣甘松鍾會分爲二隊入自斜谷使李輔圍王舍於樂城

又使步將易愷攻蔣斌於漢城會直指陽安護軍胡烈
攻陷關城姜維聞之引還王頎追敗維於彊川維與張
翼廖化合軍守劔閣鍾會攻之冬十月天子以諸侯獻
捷交至乃申前命曰朕以寡德復承天序嗣我祖宗之
洪烈遭家多難不明于訓曩者奸逆屢興方寇內侮大
懼淪喪四海以墮三祖之弘業惟公經德履哲明允廣
深迪宣武文世作保傅以輔又皇家櫛風沐雨周旋征
伐劬勞王室二十有餘載毗翼前人乃斷大政克厭不
端維安社稷暨儉欽之亂公綏援有衆分命興師統紀
有方用緝寧淮浦其後巴蜀屢侵西土不靖公奇畫指
授制勝千里是以段谷之戰乘釁大捷斬將搴旗效首
萬計孫峻猾夏致寇徐方戎車首路威靈先邁黃鉞未
啓鯨鯢竄迹孫壹構隙自相疑阻幽鑿遠照奇策洞微
遠人歸命作藩南夏爰授銳卒畢力戎行暨諸葛誕滔
天作逆稱兵揚楚欽咨逋罪同惡相濟帥其螫賊以入
壽春憑阻淮山敢距王命公躬擐甲冑龔行天罰玄謀
廟筭遵養時晦奇兵震擊而朱異摧破神變應機而全
琮稽服取亂攻昧而高壩不守兼九伐之弘略究五兵
之正度用能戰不窮武而大敵殲潰旗不再麾而元愆
授首收勅吳之雋臣係亡命之逋虜交臂屈膝委命下

吏俘馘十萬積尸成京雪宗廟之滯恥拯兆庶之艱難
掃平區域信威吳會遂戢干戈靖我疆土天地鬼神罔
不獲又乃者王室之難變起蕭牆賴公之靈弘濟艱險
宗廟危而獲安社稷墜而復寧忠格皇天功濟六合是
用疇咨古訓稽諸典籍命公崇位相國加于羣后啓土
參墟封以晉域所以方軌齊魯翰屏帝室而公遠蹈謙
損深履冲讓固辭策命至于八九朕重違讓德抑禮虧
制以彰公志于今四載上闕在昔建侯之典下違兆庶
具瞻之望惟公嚴虔王度闡濟大猷敦尚純樸省絲節
用務稽勸分九野康乂耆叟荷崇養之德鰥寡蒙於卹
之施仁風興於中夏流澤布於遐荒是以東夷西戎南
蠻北狄狂狡貪悍世爲寇讐者皆感義懷惠款塞內附
或委命納貢或求置官司九服之外絕域之氓曠世所
希至者咸浮海來享鼓舞王德前後至者八百七十餘
萬口海隅幽裔無思不服雖西旅遠貢越裳九譯義無
以踰維翼朕躬下匡萬國思靖殊方寧濟八極以庸蜀
未賓蠻荆作猾潛謀獨斷整軍經武簡練將帥授以成
策始踐賊境應時摧陷狂狡奔北首尾震潰禽其戎帥
屠其城邑巴漢震疊江源雲徹地平天成誠在斯舉公
有濟六合之勳加以茂德實摠百揆允釐庶政敦五品

以崇仁恢六典以敷訓而靖恭夙夜勞謙昧旦雖尚父
之左右文武周公之勤勞王家罔以加焉昔先王選建
明德光啓諸侯體國經邦方制五等所以藩翼王畿垂
祚百世也故齊魯之封於周爲弘山川土田邦畿七百
官司典策制殊羣后惠襄之難桓文以翼戴之勞猶受
錫命之禮咸用光疇大德作範于後惟公功邁於前烈
而賞闕於舊式百辟於邑人神同恨焉豈可以公謙冲
而又淹弘典哉今以并州之太原上黨西河樂平新興
鴈門司州之河東平陽弘農雍州之馮翊凡十郡南至
於華北至于陘東至于壺口西踰于河提封之數方七
百里皆晉之故壤唐叔受之世作盟主實紀綱諸夏用
率舊職爰胙茲土封公爲晉公命使持節兼司徒司隸
校尉陔卽授印綬策書金獸符第一至第五竹使符第
一至第十錫茲玄土苴以白茅建爾國家以永藩魏室
昔在周召竝以公侯入作保傅其在近代鄭侯蕭何實
以相國光尹漢朝隨時之制禮亦宜之今進公位爲相
國加綠綬綬又加公九錫其敬聽後命以公思弘大猷
崇正典禮儀刑作範旁訓四方是用錫公大輅戎輅各
一玄牡二駟公道和陰陽敬授人時嗇夫反本農殖維
豐是用錫公衮冕之服赤舄副焉公光敷顯德惠下以

和敬信思順庶尹允諧是用錫公軒懸之樂六佾之舞
公鎮靖宇宙翼播聲教海外懷服荒裔款附殊方馳義
諸夏順軌是用錫公朱戶以居公簡賢料材營求俊逸
爰升多士寘彼周行是用錫公納陛以登公嚴恭寅畏
底平四國式遏寇虐苛厲不作是用錫公武賁之士三
百人公明慎用刑簡恤大中章厥天威以糾不虔是用
錫公鈇鉞各一公爰整六軍典司征伐犯命凌正乃維
誅殛是用錫公彤弓一彤矢百茲弓十茲矢千公饗祀
蒸蒸孝思維則篤誠之至通于神明是用錫公柎鬯一
卣珪瓚副焉晉國置官司以下率由舊式往欽哉祗服
朕命弘敷訓典光澤庶方永終爾明德丕顯余一人之
休命公卿將校皆詣府諭旨帝以禮辭讓司空鄭冲率
羣官勸進曰伏見嘉命顯至竊聞明公固讓冲等眷眷
實有愚心以爲聖王作制百代同風褒德賞功有自來
矣昔伊尹有莘氏之媵臣耳一佐成湯遂荷阿衡之號
周公藉已成之勢據旣安之業光宅曲阜奄有龜蒙呂
尚磻溪之漁者也一朝指麾乃封營丘自是以來功薄
而賞厚者不可勝數然賢哲之士猶以爲美談况自先
相國以來世有明德翼輔魏室以綏天下朝無秕政人
無謗言前者明公西征靈州北臨沙漠榆中以西望風

震服羌戎來馳臣首內更臣叛逆全軍獨克禽闔閭
之將虜輕銳之卒以萬萬計威加南海名懾三越宇內
康寧苛慝不作是以時俗畏懷東夷獻舞故聖上覽乃
昔以來禮典舊章開國光宅顯茲太原明公宜承奉聖
旨受茲介福允當天人元功盛勳光光如彼國土嘉祚
魏魏如此內外協同靡愆靡違由斯征伐則可朝服濟
江埽除吳會西塞江源望祀岷山迴戈弭節以麾天下
遠無不服邇無不肅令大魏之德光于唐虞明公盛勳
超於桓文然後臨滄海而謝文伯登箕山而揖許由豈
不盛乎至公至平誰與爲鄰何必勤勤小讓也哉帝乃
受命十一月鄧艾帥萬餘人自陰平踰絕險至江油破
蜀將諸葛瞻於綿竹斬瞻傳首進軍雒縣劉禪降天子
命晉公以相國摠百揆於是上節傳去侍中大都督錄
尚書之號焉表鄧艾爲太尉鍾會爲司徒會潛謀叛逆
因密使譖艾

咸熙元年春正月檻車徵艾乙丑帝奉天子西征次于
長安是時魏諸王侯悉在鄴城命從事中郎山濤行軍
司事鎮於鄴遣護軍賈充持節督諸軍據漢中鍾會遂
反於蜀監軍衛瓘右將軍胡烈攻會斬之初會之伐蜀
也西曹屬邵悌言於帝曰鍾會難信不可令行帝笑曰

取蜀如指掌而衆人皆言不可唯會與吾意同滅蜀之
後中國將士人自思歸蜀之遺黎猶懷震恐縱有異志
無能爲也卒如所量景辰帝至自長安三月己卯進帝
爵爲王增封并前二十郡夏五月癸未天子追加舞陽
宣文侯爲晉宣王舞陽忠武侯爲晉景王秋七月帝奏
司空荀顛定禮儀中護軍賈充正法律尙書僕射裴秀
議官制大保鄭冲總而裁焉始建五等爵冬十月丁亥
奏遣吳人相國參軍徐劭散騎常侍水曹屬孫彧使吳
喻孫皓以平蜀之事致馬錦等物以示威懷景午天子
命中撫軍新昌鄉侯炎爲晉世子

二年春二月甲辰胸臆縣獻靈龜歸於相府夏四月孫
皓使紀陟來聘且獻方物五月天子命帝冕十有二旒
建天子旌旗出警入蹕乘金根車駕六馬備五時副車
置旄頭雲罕樂舞八佾設鍾虞宮懸位在燕王上進王
妃爲王后世子爲太子王女王孫爵命之號皆如帝者
之儀諸禁網煩苛及法式不便於時者帝皆奏除之晉
國置御史大夫侍中常侍尙書中領軍衛將軍官秋八
月辛卯帝崩于露寢時年五十五九月癸酉葬崇陽陵
諡曰文王武帝受禪追尊號曰文皇帝廟稱太祖
史臣曰世宗以叡略創基太祖以雄才成務事殷之跡

空存翦商之志彌遠三分天下功業在焉及踰劍銷氛
浮淮靜亂桐宮胥怨或所不堪若乃體以名臣恪之端
揆周公流連於此歲魏武得意於茲日軒懸之樂大啓
南陽師摯之旨於焉北面壯矣哉包舉天人者也為帝
之主不亦難乎

贊曰世宗繼文邦權未分三千之士其從如雲世祖無
外靈關靜氛反雖討賊終為弑君

晉書卷二

帝紀第二

晉書卷三

帝紀第三

唐太宗文皇帝御撰

皇明承直郎國子監司業臣方從哲等

勅重較刊
皇明朝列大夫國子監祭酒臣吳士元
承德郎司業仍加俸一級臣黃
旨重修
錦等奉

武帝

武皇帝諱炎字安世文帝長子也寬惠仁厚沉深有度
量魏嘉平中封北平亭侯歷給事中奉車都尉中壘將
軍加散騎常侍累遷中護軍假節迎帝道鄉公於東武
陽遷中撫軍進封新昌鄉侯及晉國建立為世子拜撫

軍大將軍開府副貳相國初文帝以景帝既宣帝之嫡
早世無後以帝弟攸爲嗣特加愛異自謂攝居相位百
年之後大業宜歸攸每曰此景王之天下也吾何與焉
將議立世子屬意於攸何曾等固爭曰中撫軍聰明神
武有超世之才髮委地手過膝此非人臣之相也由是
遂定

咸熙二年五月立爲晉王太子八月辛卯文帝崩太子
嗣相國晉王位下令寬刑宥罪撫衆息役國內行服三
日是月長人見於襄武長三文告縣人王始曰今當太
平九月戊午以魏司徒何曾爲丞相鎮南將軍王沉爲

御史大夫中護軍賈充爲衛將軍議郎裴秀爲尚書令
光祿大夫皆開府十一月初置四護軍以統城外諸軍
乙未令諸郡中正以六條舉淹滯一曰忠恪匪躬二曰
孝敬盡禮三曰友于兄弟四曰潔身勞謙五曰信義可
復六曰學以爲己是時晉德既洽四海宅心於是天子
知歷數有在乃使太保鄭冲奉策曰咨尔晉王我皇祖
有虞氏誕膺靈運受終于陶唐亦以命于有夏惟三后
陟配于天而咸用光敷聖德自茲厥後天又輯大命于
漢火德旣衰乃眷命我高祖方軌虞夏四代之明顯我
不敢知惟王乃祖乃父服膺明哲輔亮我皇家勳德光

于四海格爾上下神祇罔不克順地平天成萬邦以乂
應受上帝之命協皇極之中肆予一人祇承天序以敬
授爾位歷數實在爾躬允執其中天祿未終於戲王其
欽順天命率循訓典底綏四國用保天休無替我二皇
之弘烈帝初以禮讓魏朝公卿何曾王沉等固請乃從
之

秦始皇元年冬十二月景寅設壇于南郊百僚在位及匈奴南單于四夷會者數萬人柴燎告類于上帝曰皇帝臣炎敢用玄牡明告于皇皇后帝魏帝稽協皇運紹天明命以命炎昔者唐堯熙隆大道禪位虞舜舜又以禪

禹邁德垂訓多歷年載暨漢德既衰太祖武皇帝撥亂濟時扶翼劉氏又用受命于漢粵在魏室仍世多故幾於顛隳是賴有晉匡拯之德用獲保厥肆祀弘濟于艱難此則晉之有大造于魏也誕惟四方罔不祇順廓清梁岷包懷揚越八紘同軌祥瑞屢臻天人協應無思不服肆予憲章三后用集大命于茲炎維德不嗣辭不獲命於是羣公卿士百辟庶僚黎獻陪隸暨于百蠻君長僉曰皇天鑒下求人之瘼既有成命固非克讓所得距違天序不可以無統人神不可以曠主炎虔奉皇運寅畏天威敬簡元辰升壇受禪告類上帝未答衆望禮畢

卽洛陽宮幸太極前殿詔曰昔朕皇祖宣王聖哲欽明
誕應期運熙帝之載肇啓洪基伯考景王履道宣猷緝
熙諸夏至于皇考文王叡哲光遠允協靈祇應天順時
受茲明命仁濟于宇宙功格于上下肆魏氏弘鑒于古
訓儀刑于唐虞疇咨羣后爰輯大命于朕身予一人畏
天之命用不敢違惟朕寡德負荷洪烈託于王公之上
以君臨四海惴惴惟懼罔知所濟惟爾股肱爪牙之佐
文武不貳之臣乃祖乃父實左右我先王光隆我大業
思與萬國共饗休祚於是大赦改元賜天下爵人五級
鰥寡孤獨不能自存者穀人五斛復天下租賦及關市
之稅一年逋債宿負皆勿收除舊嫌解禁錮亡官失爵
者悉復之丁卯遣太僕劉原告于太廟封魏帝爲陳留
王邑萬戶居于鄴宮魏氏諸王皆爲縣侯追尊宣王爲
宣皇帝景王爲景皇帝文王爲文皇帝宣王妃張氏爲
宣穆皇后尊太妃王氏曰皇太后宮曰崇化封皇叔祖
父孚爲安平王皇叔父幹爲平原王亮爲扶風王佺爲
東莞王駿爲汝陰王彤爲梁王倫爲琅邪王皇弟攸爲
齊王鑿爲樂安王幾爲燕王皇從伯父望爲義陽王皇
從叔父輔爲渤海王晃爲下邳王瓌爲太原王珪爲高
陽王衡爲常山王子文爲沛王泰爲隴西王權爲彭城

王綏爲范陽王遂爲濟南王遂爲譙王睦爲中山王凌
爲北海王斌爲陳王皇從父兄洪爲河間王皇從父弟
琳爲東平王以驃騎將軍石苞爲大司馬封樂陵公車
騎將軍陳騫爲高平公衛將軍賈充爲車騎將軍魯公
尚書令張秀爲鉅鹿公侍中荀勗爲濟北公太保鄭冲
爲太傅壽光公太尉王祥爲太保睢陵公丞相何曾爲
太尉朗陵公御史大夫王沉爲驃騎將軍博陵公司空
荀顗爲臨淮公鎮北大將軍衛瓘爲奮陽公其餘增封
進爵各有差文武普增位二等改景初歷爲太始歷臘
以酉社以丑戌辰下詔大弘儉約出御府珠玉玩好之
物頒賜王公以下各有差省中軍將軍以統宿衛七軍
已巳詔陳留王載天子旌旗備五時副車行魏正朔郊
祀天地禮樂制度皆如魏舊上書不稱臣賜山陽公劉
康安樂公劉禪子弟一人爲駙馬都尉乙亥以安平王
孚爲太宰假黃鉞大都督中外諸軍事詔曰昔王凌謀
廢齊王而王竟不足以守位鄧艾雖矜功失節然束手
受罪今大赦其家還使立後興滅繼絕約法省刑除魏
氏宗室禁錮諸將吏遭三年喪者遣寧終喪百姓復其
徭役罷部曲將長吏以下質任省郡國御調禁樂府靡
麗百戲之技及雕文游畋之具開直言之路置諫官以

掌之是月鳳皇六青龍三白龍二麒麟各一見于郡國
二年春正月景戌遣兼侍中侯史光等持節四方循省
風俗除禳祝之不在祀典者丁亥有司請建七廟帝重
其役不許庚寅罷雞鳴鼓辛丑尊景皇帝夫人羊氏曰
景皇后宮曰弘訓景午立皇后楊氏二月除漢宗室禁
錮已未常山王衡薨詔曰五等之封皆錄舊勳本爲縣
侯者傳封次子爲亭侯爲鄉侯爲關內侯亭侯爲關中
侯皆食本戶十分之一丁丑郊祀宣皇帝以配天宗祀
文皇帝於明堂以配上帝庚午詔曰古者百官官箴王
闕然保氏特以諫諍爲職今之侍中常侍實處此位擇
其能正色弼違匡救不逮者以兼此選三月戊戌吳人
來弔祭有司奏爲答詔帝曰昔漢天文光武懷撫尉佗公
孫述皆未正君臣之儀所以羈縻未賓也結遣使之始
未知國慶但以書答之夏五月戊辰詔曰陳留王操尙
謙沖每事輒表非所以優崇之也主者喻意非大事皆
使王官表上之壬子驃騎將軍博陵公王沉卒六月壬
申濟南王遂薨秋七月辛巳營太廟致荆山之木采華
山之石鑄銅柱十二塗以黃金鏤以百物綴以明珠戊
戌譙王遜薨景午晦日有食之八月景辰省右將軍官
初帝雖從漢魏之制旣葬除服而深衣素冠降席撤膳

哀敬如喪者戊辰有司奏改服進膳不許遂禮終而後復吉及太后之喪亦如之九月乙未散騎常侍皇甫陶傳玄領諫官上書諫諍有司奏請寢之詔曰凡關言人主人臣所至難而苦不能聽納自古忠臣直士之所慷慨也每陳事出付主者多從深刻乃云恩貸當由主上是何言乎其詳評議戊戌有司奏大晉繼三皇之蹤蹈舜禹之跡應天順時受禪有魏宜一用前代正朔服色皆如虞遵唐故事奏可冬十月景午朔日有食之丁未詔曰昔舜葬蒼梧農不易畝禹葬成紀市不改肆上惟祖考清簡之旨所徙陵十里內居人動爲煩擾一切停之十一月己卯倭人來獻方物并園丘方丘於南北郊二至之祀合於二郊罷山陽公國督軍除其禁制己丑追尊景帝夫人夏侯氏爲景懷皇后辛卯遷祖禰神主于太廟十二月罷農官爲郡縣是歲鳳皇六青龍十黃龍九麒麟各一見于郡國

三年春正月癸丑白龍二見于弘農澗池丁卯立皇子衷爲皇太子詔曰朕以不德託于四海之上兢兢祇畏懼無以康濟寓內思與天下式明王度正本清源於置胤樹嫡非所先務又近世每建太子寬宥施惠之事間不獲已順從王公卿士之議耳方今世運垂平將陳之

以德義示之以好惡使百姓蠲多幸之慮篤終始之行
曲惠小仁故無取焉咸使知聞三月戊寅初令二千石
得終三年喪丁未晝昏罷武衛將軍官以李憺爲太子
太傅太山石崩夏四月戊午張掖太守焦勝上言氐池
縣大柳谷口有玄石一所白晝成文實太晉之休祥圖
之以獻詔以制幣告于太廟歲之天府秋八月罷都護
將軍以其五署還光祿勳九月甲申詔曰古者以德詔
爵以庸制祿雖下士猶食上農外足以奉公忘私內足
以養親施惠今在位者祿不代耕非所以崇化之本也
其議增吏俸賜王公以下帛各有差以太尉何曾爲太
保義陽王望爲太尉司空荀顛爲司徒冬十月聽士卒
遭父母喪者非在疆場皆得奔赴十二月徙宗聖侯孔
震爲奉聖亭侯山陽公劉康來朝禁星氣讖緯之學
四年春正月辛未以尚書令裴秀爲司空景戌律令成
封爵賜帛各有差有星孛于軫丁亥帝耕于藉田戊子
詔曰古設象刑而衆不犯今雖叅夷而姦不絕何德刑
相去之遠哉先帝深愍黎元哀矜庶獄乃命羣后考正
典刑朕守遺業永惟保乂皇基思與萬國以無爲爲政
方今陽春養物東作始興朕親率王公卿士耕藉田千
畝又律令旣就班之天下將以簡法務本惠育海內宜

寬有罪使得自新其大赦天下長吏郡丞長史各賜馬一匹二月庚子增置山陽公國相郎中令陵令雜工宰人鼓吹車馬各有差罷中軍將軍置北軍中候官甲寅以東海劉儉有至行拜爲郎以中軍將軍羊祜爲尚書左僕射東莞王佑爲尚書右僕射三月戊子皇太后王氏崩夏四月戊戌太保睢陵公王祥薨己亥祔葬文明皇后王氏於崇陽陵罷振威揚威護軍官置左右積弩將軍六月甲申朔詔曰郡國守相三載一巡行屬縣必以春此古者所以述職宣風展義也見長吏觀風俗協禮律考度量存問耆老親見百年錄囚徒理寃枉詳察

政刑得失知百姓所患苦無有遠近便若朕親臨之敦喻五教勸務農功勉勵學者思勤正典無爲百家庸末致遠必泥士庶有好學篤道孝弟忠信清白異行者舉而進之有不孝敬於父母不長悌於族黨悖禮棄常不率法令者糾而罪之田疇闢生業修禮教設禁令行則長吏之能也人窮匱農事荒姦盜起刑獄煩下陵上替禮義不興斯長吏之否也若長吏在官公廉慮不及私正色直節不飾名譽者及身行貪穢諂黷求容公節不立而私門日富者竝謹察之揚清激濁舉善彈違此朕所以垂拱摠綱責成於良二千石也於戲戒哉秋七月

太山石崩衆星西流戊午遣使者侯史光循行天下巳卯謁崇陽陵九月青徐兗豫四州大水伊洛溢合於河開倉以振之詔曰雖詔有所欲及奏得可而於事不便者皆不可隱情冬十月吳將施績入江夏萬郁寇襄陽遣太尉義陽王望屯龍陂荊州刺史胡烈擊敗郁吳將顧容寇鬱林太守毛炅大破之斬其交州刺史劉俊將軍脩則十一月吳將丁奉等出芍陂安東將軍汝陰王駿與義陽王望擊走之巳未詔王公卿尹及郡國守相舉賢良方正直言之士十二月班五條詔書於郡國一曰正身二曰勤百姓三曰撫孤寡四曰敦本息末五曰去人事庚寅帝臨聽訟觀錄廷尉洛陽獄囚親平決焉扶南林邑各遣使來獻

五年春正月癸巳申戒郡國計吏守相令長務盡地利禁游食商販景申帝臨聽訟觀錄囚徒多所原遣青龍二見於滎陽二月以雍州隴右五郡及涼州之金城梁州之陽平置秦州辛巳白龍二見於趙國青徐兗三州水遣使振恤之壬寅以尚書左僕射羊祜都督荊州諸軍事征東大將軍衛瓘都督青州諸軍事東莞王仲爲鎮東大將軍都督徐州諸軍事丁亥詔曰古者歲書羣吏之能否三年而誅賞之諸今史前後但簡遺疎劣而

無有勸進非黜陟之謂也其條勤能有稱尤異者歲以爲常吾將議其功勞已未詔蜀相諸葛亮孫京隨才署吏夏四月地震五月辛卯朔鳳皇見于趙國曲赦交趾九真日南五歲刑六月鄴奚官督郭廙上疏陳五事以諫言甚切直擢爲屯留令西平人麴路伐登聞鼓言多祇謗有司奏棄市帝曰朕之過也捨而不問罷鎮軍將軍復置左右將軍官秋七月延羣公詢讜言九月有星孛于紫宮冬十月景子以汲郡太守王宏有政績賜穀千斛十一月追封諡皇弟兆爲城陽哀王以皇子景度嗣十二月詔州郡舉勇猛秀異之才

六年春正月丁亥朔帝臨軒不設樂吳將丁奉入渦口揚州刺史牽弘擊走之三月赦五歲刑已下夏四月白龍二見於東莞五月立壽安亭侯承爲南宮王六月戊午秦州刺史胡秋擊叛虜於萬斛堆力戰死之詔遣尚書石鑿行安西將軍都督秦州諸軍事與奮威護軍田章討之秋七月丁酉復隴右五郡遇寇害者租賦不能自存者廩貸之乙巳城陽王景度薨詔曰自秦始以來大事皆撰錄秘書寫副後有其事輒宜綴集以爲常丁未以汝陰王駿爲鎮西大將軍都督雍涼三州諸軍事九月大宛獻汗血馬焉耆來貢方物冬十一月幸辟雍

行鄉飲酒之禮賜太常博士帛牛酒各有差立皇子東
爲汝南王十二月吳夏口督前將軍孫秀帥衆來奔拜
驃騎將軍開府儀同三司封會稽公戊辰復置鎮軍官
七年春正月景午皇太子冠賜王公以下帛各有差旬
奴帥劉猛叛出塞三月孫皓帥衆趨壽陽遣大司馬望
屯淮北以距之三月景戌司空鉅鹿公裴秀薨癸巳以
中護軍王業爲尚書左僕射高陽王珪爲尚書右僕射
孫秀部將何崇帥衆五千人來降夏四月九真太守董
元爲吳將虞汜所攻軍敗死之北地胡寇金城涼州刺
史牽弘討之羣虜內叛圍弘於青山弘軍敗死之五月
立皇子憲爲城陽王雍涼秦三州饑赦其境內殊死以
下閏月大雪大官減膳詔交趾三郡南中諸郡無出今
年戶調六月詔公卿以下舉將帥各一人辛丑大司馬
義陽王望薨大雨霖伊洛河溢流居人四千餘家殺三
百餘人有詔振貸給棺秋七月癸酉以車騎將軍賈充
爲都督秦涼二州諸軍事吳將陶璜等圍交趾太守楊
稷與鬱林太守毛炅及日南等三郡降於吳八月景戌
以征東大將軍衛瓘爲征北大將軍都督幽州諸軍事
景申城陽王憲薨分益州之南中四郡置寧州曲赦四
郡殊死已下冬十月丁丑日有食之十一月丁巳衛公

三書卷三
帝紀
姬署薨十二月大雪罷中領軍并北軍中侯以光祿大夫鄭袤爲司空

八年春正月監軍何楨討匈奴劉猛屢破之左部帥李恪殺猛而降癸亥帝耕于藉田二月乙亥禁彫文綺組非法之物壬辰太宰安平王孚薨詔內外羣官舉任邊郡者各三人帝與右將軍皇甫陶論事陶與帝爭言散騎常侍鄭徽表請罪之帝曰謹言謬所望於左右也人主常以阿媚爲患豈以爭臣爲損哉徽越職妄奏豈朕之意遂免徽官夏四月置後將軍以備四軍六月益州牙門張弘誣其刺史皇甫晏反殺之傳首京師弘坐

伏誅夷三族壬辰大赦景中詔復隴右四郡遇寇害者田租秋七月以車騎將軍賈充爲司空九月吳西陵督步闡來降拜衛將軍開府儀同三司封宜都公吳將陸抗攻闡遣車騎將軍羊祜帥衆出江陵荊州刺史楊肇迎闡於西陵巴東監軍徐胤擊建平以救闡冬十月辛未朔日有食之十二月肇攻抗不克而還闡城陷爲抗所禽

九年春正月辛酉司空密陵侯鄭袤薨二月癸巳司徒樂陵公石苞薨立安平亭侯隆爲安平王三月立皇子祗爲東海王夏四月戊辰朔日有食之五月旱以太保

何曾領司徒六月乙未東海王祗薨秋七月丁酉朔日
有食之吳將魯淑圍弋陽征虜將軍王渾擊敗之罷五
官左右中郎將弘訓大僕衛尉大長秋等官鮮卑寇廣
寧殺略五千人詔聘公卿以下子女以備六宮采擇未
畢權禁斷婚姻冬十月辛巳制女年十七父母不嫁者
使長吏配之十一月丁酉臨宣武觀大閱諸軍甲辰乃
罷

十年春正月辛亥帝耕于藉田閏月癸酉太傅壽光公
鄭冲薨己卯高陽王珪薨庚辰太原王瓌薨丁亥詔曰
庶之別所以辨上下明貴賤而近世以來多皆內寵
登妃后之職亂尊卑之序自今以後皆不得登用妾媵
以爲嫡正二月分幽州五郡置平州三月癸亥日有食
之夏四月己未太尉臨淮公荀顗薨六月癸巳臨聽訟
觀錄囚徒多所原遣是夏大蝗秋七月景寅皇后楊氏
崩壬午吳平虜將軍孟泰偏將軍王嗣等帥衆降八月
涼州虜寇金城諸部鎮西將軍汝陰王駿討之斬其帥
乞文泥等戊申葬元皇后于峻陽陵九月癸亥以大將
軍陳騫爲太尉攻拔吳枳里城獲吳立信校尉莊祐吳
將孫遵李承帥衆寇江夏太守稽喜擊破之立河橋于
富平津冬十一月立城東七里澗石橋庚午帝臨宣武

觀大閱諸軍十二月有星孛于軫置藉田令立大原王
子緝爲高陽王吳威北將軍嚴聰揚威將軍嚴整偏將
軍朱買來降是歲鑿陝南山決河東注洛以通運漕
咸寧元年春正月戊午朔大赦改元二月以將士應已
娶者多家有五女者給復辛酉以故鄴令夏謨有清稱
賜穀百斛以奉祿薄賜公卿以下帛有差叛虜樹機能
送質請降夏五月下邳廣陵大風拔木壞廬舍六月鮮
卑力微遣子來獻吳人寇江夏西域戊巳校尉馬循討
叛鮮卑破之斬其渠帥戊申置太子詹事官秋七月甲
申晦日有食之郡國螟八月壬寅沛王子文薨以故太
傅鄭沖太尉荀顛司徒石苟司空裴秀驃騎將軍王沉
安平獻王孚等及太保何曾司空賈充太尉陳騫中書
監荀勗平南將軍羊祜齊王攸等皆列於銘饗九月甲
子青州螟徐州大水冬十月乙酉常山王殷薨癸巳彭
城王權薨十一月癸亥大閱於宣武觀至于巳巳十二
月丁亥追尊宣帝廟曰高祖景帝曰世宗文帝曰太祖
是月大疫洛陽死者大半封裴頠爲鉅鹿公

二年春正月以疾疫廢朝賜諸散吏至于士卒絲各有
差二月景戌河間王洪薨甲午赦五歲刑以下東夷八
國歸化并州虜犯塞監并州諸軍事胡奮擊破之初燧

煌太守尹瓌卒州以燉煌令梁澄領太守事議郎令狐
豐廢澄自領郡事豐死弟宏代之至是涼州刺史楊欣
斬宏傳首洛陽先是帝不豫及瘳羣臣上壽詔曰每念
頃遇疫氣死亡爲之愴然豈以一身之休息忘百姓之
艱邪諸上禮者皆絕之夏五月鎮西大將軍汝陰王駿
討北胡斬其渠帥吐敦立國子學庚午大雩六月癸丑
薦荔枝于太廟甲戌有星孛于氏自春旱至于是月始
雨吳京下督孫楷帥衆來降以爲車騎將軍封丹陽侯
白龍二見于新興井中秋七月有星孛于大角吳臨平
湖自漢末壅塞至是自開父老相傳云此湖塞天下亂

此湖開天下平癸丑安平王隆薨東夷十七國內附河
南魏郡暴水殺百餘人詔給棺槨鮮卑阿羅多等寇邊西
域戊巳校尉馬循討之斬首四千餘級獲生九千餘人
於是來降八月庚辰河東平陽地震巳亥以太保何曾
爲太傅太尉陳騫爲大司馬司空賈充爲大尉鎮東大
將軍齊王攸爲司空有星孛于太微九月又孛于翼丁
未起太倉於城東常平倉於東西市閏月荊州五郡水
流四千餘家冬十月以汝陰王駿爲征西大將軍平南
將軍羊祜爲征南大將軍丁卯立皇后楊氏大赦賜王
公以下及于鰥寡各有差十一月白龍二見于梁國十

萬曆二十四年刊

二月徵處士安定皇甫謐爲太子中庶子封后父鎮軍將軍楊駿爲臨晉侯是月以平州刺史傅詢前廣平太守孟桓清白有聞詢賜帛二百匹桓百匹

三年春正月景子朔日有食之立皇子裕爲始平王安平穆王隆弟敦爲安平王詔曰宗室戚屬國之枝葉欲令奉率德義爲天下式然處富貴而能慎行者寡召穆公糾合兄弟而賦棠棣之詩此姬氏所以本枝百世也今以衛將軍扶風王亮爲宗師所當施行皆諮之於宗師也庚寅始平王裕薨有日生孛於西方使征北大將軍衛瓘討鮮卑力微三月平虜護軍文淑討叛虜樹機能

等破之有星孛于胃乙未帝將射雉慮損麥苗而止夏五月戊子吳將邵凱夏祥帥衆七千餘人來降六月益梁八郡水殺三百餘人沒邸閣別倉秋七月以都督豫州諸軍事王渾爲都督揚州諸軍事中山王睦以罪廢爲丹水侯八月癸亥徙扶風王亮爲汝南王東莞王佗爲琅邪王汝陰王駿爲扶風王琅邪王倫爲趙王渤海王輔爲太原王太原王顥爲河間王北海王陵爲任城王陳王斌爲西河王汝南王東爲南陽王濟南王耽爲中山王河間王威爲章武王立皇子瑋爲始平王允爲濮陽王該爲新都王遐爲清河二鉅平侯羊祜爲南城

侯以汝南王亮爲鎮南大將軍大風拔樹暴寒且冰郡國五隕霜傷穀九月戊子以左將軍胡奮爲都督江北諸軍事兗豫徐青荆益梁七州大水傷秋稼詔振給之立齊王子鈺爲遼東王贇爲廣漢王冬十一月景戌帝臨宣武觀大閱至于壬辰十二月吳將孫慎入江夏汝南略千餘家而去是歲西北雜虜及鮮卑匈奴五溪蠻夷東夷三國前後十餘輩各帥種人部落內附

四年春正月庚午朔日有食之三月甲申尚書左僕射盧欽卒辛酉以尚書右僕射山濤爲尚書左僕射東夷六國來獻夏四月蚩尤旗見於東井六月丁未陰平廣

武地震甲子又震涼州刺史楊欣與虜若羅拔能等戰于武威敗績死之弘訓皇后羊氏崩秋七月己丑祔葬景獻皇后羊氏于峻平陵庚寅高陽王緝薨癸巳范陽王綏薨荆楊郡國二十皆大水九月以太傅何曾爲太宰辛巳以尚書令李胤爲司徒冬十月以征北大將軍衛瓘爲尚書令揚州刺史應綽伐吳皖城斬首五千級焚穀米百八十萬斛十一月辛巳太醫司馬程據獻雉頭裘帝以奇技異服典禮所禁焚之於殿前甲申勅內外敢有犯者罪之吳昭武將軍劉翻厲武將軍祖始來降辛卯以尚書杜預都督荊州諸軍事征南大將軍羊

枯卒十二月乙未西河王斌薨丁未太宰朗陵公何曾薨是歲東夷九國內附

五年春正月虜帥樹機能攻陷涼州乙丑使討虜護軍武威太守馬隆擊之二月甲午白麟見于平原三月匈奴都督拔奕虛帥部落歸化乙亥以百姓饑饉減御膳之半有星孛于柳夏四月又孛于女御大赦降除部曲督以下質任丁亥郡國八雨雹傷秋稼壞百姓廬舍秋七月有星孛于紫宮九月甲午麟見于河南冬十月戊寅匈奴餘渠都督獨雍等帥部落歸化汲郡人不準掘魏襄王家得竹簡小篆古書十餘萬言藏于秘府十一

月大舉伐吳遣鎮軍將軍琅邪王仙出涂中安東將軍王渾出江西建威將軍王戎出武昌平西將軍胡奮出夏口鎮南大將軍杜預出江陵龍驤將軍王濬廣武將軍唐彬率巴蜀之卒浮江而下東西凡二十餘萬以大尉賈克爲大都督行冠軍將軍楊濟爲副總統衆軍十一月馬隆擊叛虜樹機能大破斬之涼州平肅慎來獻楛矢石砮

太康元年春正月己丑朔五色氣冠日癸丑王渾克吳尋陽賴鄉諸城獲吳威武將軍周興二月戊午王濬唐彬等剋丹陽城庚申又克西陵殺西陵都督鎮軍將軍

留憲征南將軍成璩西陵監鄭廣壬戌濬又克夷道樂鄉城殺夷道監陸晏水軍都督陸景甲戌杜預克江陵斬吳江陵督王延平南將軍胡奮剋江安於是諸軍並進樂鄉荆門諸戍相次來降乙亥以濬爲都督益梁二州諸軍事復下詔曰濬彬東下埽除巴丘與胡奮王戎共平夏口武昌順流長驚直造秣陵與奮戎審量其宜杜預當鎮靜零桂懷輯衡陽大兵旣過荆州南境固當傳檄而定預當分萬人給濬七千給彬夏口旣平奮宜以七千人給濬武昌旣了戎當以六千人增彬太尉克移屯項總督諸方濬進破夏口武昌遂泛舟東下所至皆平王渾周浚與吳丞相張悌戰于版橋大敗之斬悌及其將孫震沈瑩傳首洛陽孫皓窮蹙請降送璽綬於琅邪王佑三月壬申王濬以舟師至于建鄴之石頭孫皓大懼面縛輿櫬降于軍門濬杖節解縛焚視送于京都收其圖籍克州四郡四十三縣三百一十三戶五十二萬三千吏三萬二千兵二十三萬男女口二百三十萬其牧守已下皆因吳所置除其苛政示之簡易吳人大悅乙酉大赦改元大酺五日恤孤老困窮夏四月河東高平雨雹傷秋稼遣兼侍中張側黃門侍郎朱震分使揚越慰其初附白麟見于頓丘三河魏郡弘農雨雹

傷宿麥五月辛亥封孫皓爲歸命侯拜其太子爲中郎
諸子爲郎中吳之舊望隨才擢敘孫氏大將戰亡之家
徙於壽陽將吏渡江復十年百姓及百工復二十年景
寅帝臨軒大會引皓升殿羣臣咸稱萬歲丁卯薦鄴淶
酒于太廟郡國六電傷秋稼庚午詔諸士卒年六十以
上罷歸于家庚辰以王濬爲輔國大將軍襄陽侯杜預
當陽侯王戎安豐侯唐彬上庸侯賈克琅邪王佃以下
增封於是論功行封賜公卿以下帛各有差六月丁丑
初置翊軍校尉官封丹水侯睦爲高陽王甲申東夷十
國歸化秋七月虜軻成泥寇西平浩豐殺督將以下三
百餘人東夷二十國朝獻庚寅以尚書魏舒爲尚書右
僕射八月車師前部遣子入侍己未封皇弟延祚爲樂
平王白龍三見于末昌九月羣臣以天下一統屢請封
禪帝謙讓弗許冬十月丁巳除五女復十二月戊辰廣
漢王贊薨

二年春二月淮南丹陽地震三月景申安平王敦薨賜
王公以下吳生口各有差詔選孫皓妓妾五千人入宮
東夷五國朝獻夏六月東夷五國內附郡國十六雨雹
大風拔樹壞百姓廬舍江夏泰山水流居人三百餘家
秋七月上黨又暴風雨雹傷秋稼八月有星孛于張冬

十月鮮卑慕容廆寇昌黎十一月壬寅大司馬陳騫薨
有星孛于軒轅鮮卑寇遼西平州刺史鮮于嬰討破之
三年春正月丁丑罷秦州并雍州甲午以尚書張華都
督幽州諸軍事三月安北將軍嚴詢敗鮮卑慕容廆於
昌黎殺傷數萬人夏四月庚午太尉魯公賈克薨閏月
景子司徒廣陸侯李胤薨癸丑白龍二見于濟南秋八
月罷平州寧州刺史三年一入奏事九月東夷二十九
國歸化獻其方物吳故將瑯恭帛奉舉兵反攻害建鄴
令遂圍揚州徐州刺史嵇喜討平之冬十二月甲申以
司空齊王攸爲大司馬督青州諸軍事鎮東大將軍琅
邪王伋爲撫軍大將軍汝南王亮爲大尉光祿大夫山
濤爲司徒尚書令衛瓘爲司空景申詔四方水旱甚者
無出田租

四年春正月甲申以尚書右僕射魏舒爲尚書左僕射
下邳王晃爲尚書右僕射戊午司徒山濤薨二月己丑
立長樂亭侯寔爲北海王三月辛丑朔日有蝕之癸丑
大司馬齊王攸薨夏四月任城王陵薨五月己亥大將
軍琅邪王伋薨徙遼東王粲爲東萊王六月增九卿禮
秩牂柯獠二千餘落內屬秋七月壬子以尚書右僕射
下邳王晃爲都督青州諸軍事景寅兗州大水復其田

租八月鄯善國遣子入侍假其歸義侯以隴西王泰爲
尚書右僕射冬十一月戊午新都王該薨以尚書左僕
射魏舒爲司徒十二月庚午大閱于宣武觀是歲河南
及荊州揚州大水

五年春正月己亥青龍二見于武庫井中二月景寅立
南宮王子玷爲長樂王壬辰地震夏四月任城魯國池
水赤如血五月景午宣帝廟梁折六月初置黃沙獄秋
七月戊申皇子恢薨任城梁國中山雨雹傷秋稼減天
下戶課三分之一九月南安大風折木郡國五大水隕
霜傷秋稼冬十一月甲辰太原王輔薨十二月庚午大
赦林邑大秦國各遣使來獻閏月鎮南大將軍當陽侯
杜預卒

六年春正月庚申朔以比歲不登免租貸宿負戊辰以
征南大將軍王渾爲尚書左僕射尚書褚契都督揚州
諸軍事楊濟都督荊州諸軍事三月郡國六隕霜傷桑
麥夏四月扶南等十國來獻參離四千餘落內附郡國
四旱十大水壞百姓廬舍秋七月巴西地震八月景戊
朔日有食之減百姓絲絹三分之一白龍見于京兆以
鎮軍大將軍王濬爲撫軍大將軍九月景子山陽公劉
康薨冬十月南安山崩水出南陽郡獲兩足獸龜茲焉

者國遣子入侍十二月甲申大閱于宣武觀旬日而罷
庚寅撫軍大將軍襄陽侯王濬卒

七年春正月甲寅朔日有食之乙卯詔曰比年災異屢
發日蝕三朝地震山崩邦之不臧實在朕躬公卿大臣
各上封事極言其故勿有所諱夏五月郡國十三旱鮮
卑慕容廆寇遼東秋七月朱提山崩捷爲地震八月東
夷十一國內附京兆地震九月戊寅驃騎將軍扶風王
駿薨郡國八大水冬十一月壬子以隴西王泰都督關
中諸軍事十二月遣侍御史巡遭水諸郡出後宮才人
妓女以下二百七十人歸于家始制大臣聽終喪三年

巳亥河陰雨赤雪二頃是歲扶南等二十一國馬韓等
十一國遣使來獻

八年春正月戊申朔日有食之太廟殿陷三月乙丑臨
商觀震夏四月齊國大水隕霜傷麥六月魯國大風拔
樹木壞百姓廬舍郡國八大水秋七月前殿地陷深數
丈中有破船八月東夷二國內附九月改營太廟冬十
一月南康平固縣吏李豐反聚衆攻郡縣自號將軍十一
月海安令蕭輔聚衆反十二月吳興人蔣迪聚黨反圍
陽羨縣州郡捕討皆伏誅南夷扶南西域康居國各遣
使來獻是歲郡國五地震

九年春正月壬申朔日有食之詔曰興化之本由政平
訟理也二千石長吏不能勤恤人隱而輕挾私故與長
刑獄又多貪濁煩撓百姓其勅刺史二千石糾其穢濁
舉其公清有司議其黜陟令內外羣官舉清能拔寒素
江東四郡地震二月尚書右僕射陽夏侯胡奮卒以尚
書朱整爲尚書右僕射三月丁丑皇后親桑于西郊賜
帛各有差壬辰初并二社爲一夏四月江南郡國八地
震隴西隕霜傷宿麥五月義陽王奇有罪黜爲三縱亭
侯詔內外羣官舉守令之才六月庚子朔日有食之徒
章武王威爲義陽王郡國三十二大旱傷麥秋八月壬
子星隕如雨詔郡國五歲刑以下決遣無留庶獄九月
東夷七國詣校尉內附郡國二十四螟冬十二月癸卯
立河間平王洪子英爲章武王戊申青龍黃龍各一見
于魯國

十年夏四月以京兆太守劉霄陽平太守梁柳有政績
各賜穀千斛郡國八隕霜太廟成乙巳遷神主于新廟
帝迎于道左遂祫祭大赦文武增位一等作廟者二等
丁未尚書右僕射廣興侯朱整卒癸丑崇聖殿災五月
鮮卑慕容廆來降東夷十一國內附六月庚子山陽公
劉瑾薨復置二社冬十月壬子徙南宮王承爲武邑王

十一月景辰守尚書令左光祿大夫荀勗卒帝疾瘳賜
王公以下帛有差含章殿鞠室火甲申以汝南王亮爲
大司馬大都督假黃鉞改封南陽王東爲秦王始平王
瑋爲楚王濮陽王允爲淮南王竝假節之國各統方州
軍事立皇子乂爲長沙王穎爲成都王晏爲吳王熾爲
豫章王演爲代王皇孫適爲廣陵王立濮陽王子迪爲
漢王始平王子儀爲毗陵王汝南王次子羨爲西陽公
徙扶風王暢爲順陽王暢弟歆爲新野公琅邪王覲弟
澹爲東武公繇爲東安公淮爲廣陵公卷爲東莞公改
諸王國相爲內史十二月庚寅太廟梁折是歲東夷絕
遠三十餘國西南夷二十餘國來獻虜壬戌奚軻男女
十萬口來降

太熙元年春正月辛酉朔改元乙巳以尚書左僕射王
渾爲司徒司空衛瓘爲太保二月辛丑東夷七國朝貢
琅邪王覲薨三月甲子以右光祿大夫石鑿爲司空夏
四月辛丑以待中車騎將軍楊駿爲太尉都督中外諸
軍錄尚書事己酉帝崩于含章殿時年五十五葬峻陽
陵廟號世祖帝字量弘厚造次必於仁恕容納讜正未
嘗失色於人明達善謀能斷大事故得撫寧萬國綏靜
四方承魏氏奢侈革弊之後百姓思古之遺風乃厲以

恭儉敦以寡慾有司嘗奏御牛青絲紉斷詔以青麻代之臨朝寬裕法度有恒高陽許允既爲文帝所殺允子奇爲太常丞帝將有事於太廟朝議以奇受害之門不欲接近請出爲長史帝乃追述允夙望稱奇之才擢爲祠部郎時論稱其夷曠平吳之後天下又安遂怠於政術耽於遊宴寵愛后黨親貴當權舊臣不得專任彛章紊廢請謁行矣爰至末年知惠帝弗克負荷然恃皇孫聰睿故無廢立之心復慮非賈后所生終致危敗遂與腹心共圖後事說者紛然久而不定竟用王佑之謀遣太子母弟秦王東都督關中楚王瑋淮南王允並鎮守要害以疆帝室又恐楊氏之偏復以佑爲北軍中候以典禁兵旣而寢疾弥留至于大漸佐命元勳皆已先沒羣臣惶惑計無所從會帝小差有詔以汝南王亮輔政又欲令朝士之有名望年少者數人佐之楊駿秘而不宣帝復尋至迷亂楊后輒爲詔以駿輔政促亮進發帝尋小間問汝南王來未意欲見之有所付託左右答言未至帝遂困篤中朝之亂實始于斯矣

制曰武皇承基誕膺天命握圖御宇敷化導民以佚代勞以治易亂絕縑綸之貢去雕琢之飾制奢俗以變儉約止澆風而反淳朴雅好直言留心采擢劉毅裴楷以

質直見容嵇紹許奇雖仇讎不棄仁以御物寬而得衆
宏略大度有帝王之量焉於時民和俗靜家給人足聿
修武用思啓封疆決神筭於深衷斷雄圖於議表馬隆
西伐王濬南征師不延時獯虜削迹兵無血刃楊越爲
墟通上代之不通服前王之未服禎祥顯應風教肅清
天人之功成矣霸王之業大矣雖登封之禮讓而不爲
驕泰之心因而斯起見土地之廣謂萬葉而無虞覩天
下之安謂千年而未治不知處廣以思狹則廣可長廣
居治而忘危則治無常治加之建立非所委寄失才志
欲就於升平行先迎於禍亂是猶將適越者指沙漠以
遵途欲登山者涉舟航而覓路所趨逾遠所尚轉難南
北倍殊高下相反求其至也不亦難乎況以新習易動
之基而無乂安難拔之慮故賈克凶豎懷姦志以擁權
楊駿豺狼苞禍心以專輔及乎宮車晚出諒闇未周藩
翰變親以成疎連兵競滅其本棟梁回忠而起僞擁衆
各舉其威曾未數年綱紀大亂海內版蕩宗廟播遷帝
道王猷反居文身之俗神州赤縣翻成被髮之鄉棄所
大以資人掩其小而自託爲天下笑其故何哉良由失
慎於前所以貽患於後且知子者賢父知臣者明君子
不肖則家亡臣不忠則國亂國亂不可以安也家亡不

以全也是以君子防其始聖人閑其端而世祖惑荀勗之奸謀迷王渾之偽策心屢移於衆口事不定於已置元海當除而不除卒令擾亂區夏惠帝可廢而不廢終使傾覆洪基夫全一人者德之輕極天下者功之重棄二子者忍之小安社稷者孝之大況乎資三世而成業延二孽以喪之所謂取輕德而捨重功畏小忍而忘大孝聖賢之道豈若斯乎雖則善始於初而幸令終於末所以殷勤史策不能無慷慨焉

晉書卷三

帝紀第三

晉書卷四

帝紀第四

唐太宗文皇帝御機

皇明承直郎國子監司業臣方從哲等

勅重較刊
皇明朝列大夫國子監祭酒臣吳士元
承德郎司業仍加俸一級臣黃錦等奉
旨重修

惠帝

孝惠皇帝諱衷字正度武帝第二子也泰始三年立爲皇太子時年九歲太熙元年四月巳酉武帝崩是日皇太子卽皇帝位太赦改元爲末熙尊皇后楊氏曰皇太后立妃賈氏爲皇后夏五月辛未葬武皇帝於峻陽陵

景子增天下位一等預喪事者二等復祖調一年二千石已上皆封關中侯以太尉楊駿爲太傅輔政秋八月壬午立廣陵王適爲皇太子以中書監何劭爲太子太師吏部尚書王戎爲太子太傅衛將軍楊濟爲太子太保遣南中郎將石崇射聲校尉胡奕長水校尉趙俊揚烈將軍趙歡將屯兵四出冬十月辛酉以司空石鑒爲太尉前鎮西將軍隴西王泰爲司空

永平元年春正月乙酉朔臨朝不設樂詔曰朕夙遭不造淹恤在疚賴祖宗遺靈宰輔忠賢得以眇身託于群后之上昧於大道不明于訓戰戰兢兢夕惕若厲乃者哀迷之際三事朕肱惟社稷之重率遵翼室之典猶欲長奉先皇之制是以有永熙之號然日月踰邁已涉新年開元易紀禮之舊章其改永熙二年爲永平元年又詔子弟及郡官並不得謁陵景午皇太子冠丁未見于太廟二月甲寅賜王公已下帛各有差癸酉鎮南將軍楚王瑋鎮東將軍淮南王允來朝戊寅復置秘書監官三月辛卯誅太傅楊駿弟衛將軍瑤太子太保濟中護軍張劭散騎常侍段廣楊邈左將軍劉預河南尹李斌中書令苻俊東夷校尉文淑尚書武茂皆夷三族壬辰大赦改元賈后矯詔廢皇太后爲庶人徙于金墉城

告于天地宗廟誅太后母龐氏壬寅徵大司馬汝南王
亮爲大宰與太保衛瓘輔政以秦王東爲大將軍東平
王林爲撫軍大將軍鎮南將軍楚王瑋爲衛將軍領北
軍中候下邳王晃爲尚書令東安公繇爲尚書左僕射
進封東安王督將侯者千八十一人庚戌免東安王繇
及東平王林繇徙帶方夏四月癸亥以征東將軍梁王
彤爲征西大將軍都督關西諸軍事太子少傅阮坦爲
平東將軍監青徐二州諸軍事己巳以太子太傅王戎
爲尚書右僕射五月甲戌毗陵王軌薨壬午除天下戶
調縣絹賜孝悌高年鰥寡力田者帛人三匹六月賈后
矯詔使楚王瑋殺太宰汝南王亮大保菑陽公衛瓘乙
丑以瑋擅害亮瓘殺之曲赦洛陽以廣陵王師劉寔爲
太子太保司空隴西王泰錄尚書事秋七月分揚州荆
州十郡爲江州八月庚申以趙王倫爲征東將軍都督
徐兗二州諸軍事河間王顥爲北中郎將鎮鄴太子太
師何劭爲都督豫州諸軍事鎮許昌徙長沙王乂爲常
山王己巳進西陽公羨爵爲王辛未立隴西世子越爲
東海王九月甲午大將軍秦王東薨辛丑徵征西大將
軍梁王彤爲衛將軍錄尚書事以趙王倫爲征西大將
軍都督雍梁二州諸軍事冬十二月辛酉京師地震是

歲東夷十七國南夷二十四部並詣校尉內附

二年春二月己酉賈后弒皇太后于金墉城秋八月壬子大赦九月乙酉中山王耽薨冬十一月大疫是歲沛國兩電傷麥

三年夏四月滎陽雨雹六月弘農郡雨雹深三尺冬十月太原王泓薨

四年春正月丁酉朔侍中太尉安昌公石鑿薨夏五月蜀郡山移淮南壽春洪水出山崩地陷壞城府及百姓廬舍匈奴郝散反攻上黨殺長吏六月壽春地大震死者二十餘家上庸郡山崩殺二十餘人秋八月郝散帥

衆降馮翊都尉殺之上谷居庸上庸並地陷裂水泉涌出人有死者大饑九月景辰赦諸州之遭地災者甲午枉矢東北竟天是歲京師及郡國八地震

五年夏四月慧星見于西方字于奎至軒轅六月金城地震東海雨雹深五寸秋七月下邳暴風壞廬舍九月鴈門新興太原上黨大風傷禾稼冬十月武庫火焚累代之寶十二月景戌新作武庫大調兵器丹陽雨雹有石生于京師宜年里是歲荆揚兗豫青徐等六州大水詔遣御史巡行振貸

六年春正月大赦司空下邳王晃薨以中書監張華爲

司空太尉隴西王泰爲尚書令衛將軍梁王彤爲太子
太保丁丑地震三月東海隕霜傷桑麥彭城呂縣有流
血東西百餘步夏四月大風五月荆揚二州大水匈奴
郝散弟度元帥馮翊北地馬蘭羗盧水胡反攻北地太
守張損死之馮翊太守歐陽建與度元戰建敗績徵征
西大將軍趙王倫爲車騎將軍以太子太保梁王彤爲
征西大將軍都督雍梁二州諸軍事鎮關中秋八月雍
州刺史解系又爲度元所破秦雍氐羗悉叛推氏帥齊
萬年僭號稱帝圍涇陽冬十月乙未曲赦雍涼二州十
一月景子遣安西將軍夏侯俊建威將軍周處等討萬
年梁王彤屯好時關中饑大疫

七年春正月癸丑周處及齊萬年戰於六陌王師敗績
處死之夏五月魯國雨雹秋七月雍梁州疫大旱隕霜
殺秋稼關中饑米斛萬錢詔骨肉相賣者不禁丁丑司
徒京陵公王渾薨九月以尚書右僕射王戎爲司徒太
子太師何劭爲尚書左僕射
八年春正月景辰地震詔發倉廩振雍州饑人三月壬
戌大赦夏五月郊禱石破爲二秋九月荆豫揚徐冀等
五州大水雍州有年

九年春正月左積弩將軍孟觀伐氐戰于中亭大破之


獲齊萬年徵征西大將軍梁王彤錄尚書事以北中郎
將河間王顥爲鎮西將軍鎮關中成都王穎爲鎮北大
將軍鎮鄴夏四月鄴人張承基等妖言署置聚黨數千
郡縣逮捕皆伏誅六月戊戌太尉隴西王泰薨秋八月
以尚書裴頴爲尚書僕射冬十一月甲子朔日有蝕之
京師大風發屋折木十二月壬戌廢皇太子適爲庶人
及其三子幽于金墉城弒太子母謝氏

永康元年春正月癸亥朔大赦改元己卯日有食之景
子皇孫霖卒二月丁酉大風飛沙拔木三月尉氏兩血
妖星見于南方癸未賈后矯詔害庶人適于許昌夏四
月辛卯日有蝕之癸巳梁王彤趙王倫矯詔廢賈后爲
庶人司空張華尚書僕射裴頴皆遇害侍中賈謐及黨
與數十人皆伏誅甲午倫矯詔大赦自爲相國都督中
外諸軍如宣文輔魏故事追復故皇太子位丁酉以梁
王彤爲太宰左光祿大夫何劭爲司徒右光祿大夫劉
寔爲司空淮南王允爲驃騎將軍己亥趙王倫矯詔害
賈庶人于金墉城五月己巳立皇孫臧爲皇太孫尚爲
襄陽王六月壬寅葬愍懷太子于顯平陵撫軍將軍清
河王遐薨癸卯震崇陽陵標秋八月淮南王允舉兵討
趙王倫不剋允及其二子秦王郁漢王迪皆遇害曲赦

洛陽平東將軍彭城王植薨改封吳王晏為賓徒縣王
以齊王冏為平東將軍鎮許昌光祿大夫陳準為太尉
錄尚書事九月改司徒為丞相以梁王彤為之冬十月
黃霧四塞十一月戊午大風飛砂石六月乃止甲子立
皇后羊氏大赦大酺三日十二月慧星見于東方益州
刺史趙廞與洛陽流人李庠害成都內史耿勝犍為太
守李密汶山太守霍固西夷校尉陳總據成都反

永寧元年春正月乙丑趙王倫篡帝位景寅遷帝於金
墉城號曰大上皇改金墉曰永昌宮廢皇太孫臧為濮
陽王五星經天縱橫無常癸酉倫害濮陽王臧洛陽流
人李特殺趙廞傳首京師三月平東將軍齊王冏起兵

以討倫傳檄州郡屯干陽翟征北大將軍成都王穎征
西大將軍河間王顥嵩山王乂豫州刺史李毅兗州刺
史王彥南中郎將新野公歆皆舉兵應之眾數十萬倫
遣其將閻和出伊闕張泓孫輔出堦坂以距冏孫會士
猗許超出黃橋以距泓及穎將趙驥石超戰於澳水會
等大敗棄軍走閻月旦戊朔日有蝕之夏四月歲星晝
見冏將何勗等擊張泓於陽翟大破之斬孫輔等辛酉
左衛將軍王興與尚書准陵王濯勒兵入宮禽倫黨孫
秀孫會許超士猗駱法以等皆斬之逐倫歸第即日乘輿



反正羣臣頓首謝罪。帝曰：非諸卿之過也。癸亥，詔曰：朕以不德，纂承皇統，遠不能光濟大業，靖綏四方；近不能開明刑威，式遏奸宄。不使逆臣孫秀敢肆凶虐，窺間王室，遂奉趙王倫饗據天位，鎮東大將軍齊王冏征北大將軍成都王穎征西大將軍河間王顥，並以明德茂親，忠規允著，首建大策，匡救國難，尚書灌共立大謀，左衛將軍王輿與羣公卿士協同謀略，親勒本營，斬秀及其二子，前趙王倫為秀所誤，與其子等已詣金墉迎朕幽宮，旋軫閭闔，豈在子一人獨饗其慶。宗廟社稷實有賴焉。於是大赦，改元孤寡，賜穀五斛，大酺五日，誅趙王倫。義陽王威、九門侯質等乃倫之黨，與五月立襄陽正尚為皇太孫。六月戊辰，大赦，增吏位二等，復封賓徒王晏為吳王，庚午東萊王蕤、左衛將軍王輿謀廢齊王冏事，泄蕤廢為庶人，輿伏誅。三族甲戌，以齊王冏為大司馬，都督中外諸軍事，成、即王穎為大將軍，錄尚書事。河間王顥為太尉，罷丞相，復置司徒官。己卯，以梁王彤為太宰，領司徒，封齊王冏功臣葛旃、牟平、公路、季小黃、公衛毅、平陰公劉真、安卿、公韓泰封丘公。秋七月甲午，立吳王晏子國為漢王，復封常山王乂為長沙王。八月大赦。戊辰，原徙邊者益州刺史羅尚討羌破之。己巳，徙南

平王祥爲宜都王下邳王韡薨以東平王懋爲平東將軍都督徐州諸軍事九月追東安王繇復其爵丁丑封楚王瑋子範爲襄陽王冬十月流人李特反於蜀十二月司空何劭薨封齊王冏子冰爲樂安王英爲濟陽王超爲淮南王是歲郡國十二旱六蝗太安元年春正月庚子安東將軍譙王隨薨三月癸卯赦司冀兗豫四州皇太孫尚薨夏四月慧星晝見五月乙酉侍中太宰領司徒梁王彤薨以右光祿大夫劉寔爲太傅太尉河間王顥遣將衙博擊李特於蜀爲特所敗遂陷梓潼巴西害廣漢太守張微自號大將軍癸卯以清河王暹子暉爲皇太子賜孤寡帛太醵五日以齊王冏爲太師東海王越爲司空秋七月兗州徐冀等四州大水冬十月地震十二月丁卯河間王顥表齊王冏窺伺神器有無君之心與成都王穎新野王歆范陽王虓同會洛陽請廢冏還第長沙王又奉乘輿屯南止車門攻冏殺之幽其諸子于金墉城廢冏弟北海王寔大赦改元以長沙王又爲太尉都督中外諸軍事封東萊侯劼子炤爲齊王二年春正月甲子朔赦五歲刑三月李特攻陷益州荊州刺史宋岱擊特斬之傳首京師夏四月特子雄復據益州五月義陽蠻張昌舉兵反以山都人丘沉爲主改

姓劉氏僞號漢建元神鳳攻破郡縣南陽太守劉彬平
南將軍羊尹鎮南大將軍新野王歆並遇害六月遣荆
州刺史劉弘等討張昌于方城王師敗績秋七月中書
令卞粹侍中馮蓀河南尹李含等貳於長沙王又疑
而害之張昌陷江南諸郡武陵太守賈隆零陵太守孔
紘豫章太守閻濟武昌太守劉根皆遇害昌別帥石冰
寇揚州刺史陳徽與戰大敗諸郡盡沒臨淮人封雲舉
兵應之阜陵寇徐州八月河間王顥成都王穎舉兵討
長沙王又帝以又爲大都督帥軍禦之庚申劉弘及張
昌戰於清水斬之顥遣其將張方穎遣其將陸機牽秀
石超等來逼京師乙丑帝幸十三里橋遣將軍皇甫商
距方於宜陽己巳帝旋軍于宣武庚午舍于石樓天中
裂無雲而雷九月丁丑帝次于河橋壬午皇甫商爲張
方所敗甲申帝軍于芒山丁亥幸偃師辛卯舍于豆田
癸巳尚書右僕射興晉侯羊玄之卒帝旋于城東景申
進軍緱氏擊牽秀走之六赦張方入京城燒清明開陽
二門死者萬計石超逼乘輿于緱氏冬十月壬寅帝旋
于宮石超焚緱氏服御無遺丁未破牽秀范陽王虓于
東陽門外戊申破陸機于建春門石超走斬其大將賈
崇等十六人懸首銅駝街張方退屯十三里橋十一月

辛巳星晝隕聲如雷王師攻方壘不利方決千金竭水
碓皆涸乃發王公奴婢手舂給兵廩一品已下不從征
者男子十三以上皆從役又發奴助兵號爲四部司馬
公私窮蹶米石萬錢詔命所至一城而已壬寅夜赤氣
竟天隱隱有聲景辰地震癸亥東海王越執長沙王又
幽於金墉城尋爲張方所害甲子大赦景寅揚州秀才
周玘前南平內史王矩前吳興內史顧秘起義軍以討
石冰冰退自臨淮趣壽陽征東將軍劉準遣廣陵度支
陳敏擊冰李雄自郫城攻益州刺史羅尚尚奔城而退
惟盡有成都之地封鮮卑段勿塵爲遼西公

永興元年春正月景午尚書令樂廣卒成都王穎目鄴
諷于帝乃大赦改元爲永安帝逼於河間王顥密詔雍
州刺史劉沉秦州刺史皇甫重以討之沉舉兵攻長安
爲顥所敗張方大掠洛中還長安於是軍中大餒人相
食以成都王穎爲丞相穎追從事中郎盛夔等以兵五
萬屯十二城門殿中宿所忌者穎皆殺之以三部兵代
宿衛二月乙酉廢皇后羊氏幽于金墉城黜皇太子單
復爲清河王三月陳敏攻石冰斬之揚徐二州平河間
王顥表請立成都王穎爲太弟戊申詔曰朕以不德纂
承鴻緒于茲十有五載禍亂滔天奸逆仍起至乃幽廢

重宮宗廟圯絕成都王穎溫仁惠和剋平暴亂其以穎
爲皇太弟都督中外諸軍事丞相如故大赦賜鰥寡高
年帛三匹大酺五日景辰盜竊太廟服器以大尉顓爲
太宰太傅劉寔爲太尉六月新作三城門秋七月景申
朔右衛將軍陳珍以詔召百寮入殿中因勒兵討成都
王穎戊戌大赦復皇后羊氏及皇太子覃已亥司徒王
戎東海王越高密王簡平昌公模吳王晏豫章王熾襄
陽王範右僕射荀藩等奉帝北征至安陽衆十餘萬穎
遣其將石超距戰己未六軍敗績于蕩陰矢及乘輿百
官分散侍中嵇紹死之帝傷頰中三矢亡六璽帝遂幸
廷軍餒甚超進水左右奉秋桃超遣弟熙奉帝之鄴穎
帥羣官迎謁道左帝下輿涕泣其夕幸于穎軍穎府有
九錫之儀陳留王送貂蟬文衣鷓尾明日乃備法駕幸
于鄴惟豫章王熾司徒王戎僕射荀藩從庚申大赦改
元爲建武八月戊辰穎殺東安王繇張方復入洛陽廢
皇后羊氏及皇太子覃匈奴左賢王劉元海反於離石
自號大單于安北將軍王浚遣烏丸騎攻成都王穎于
鄴大敗之穎與帝單車走洛陽服御分散倉卒上下無
齋侍中黃門被囊中齋私錢二千詔貸用所在買飯以
供宮人止食于道中客舍官人有持升餘糝米飯及燥

赫鹽豉以進帝帝噉之御中黃門布被次獲嘉市鹿米
飯盛以瓦盆帝噉兩盂有老父獻蒸鷄帝受之至溫將
謁陵帝喪履納從者之履下拜流涕左右皆歔歔及濟
河張方帥騎三千以陽燧青蓋車奉迎方拜謁帝躬止
之辛巳大赦賞從者各有差冬十一月乙未方請帝謁
廟因劫帝幸長安方以所乘車入殿中帝馳避後園竹
中方逼帝升車左右中黃門鼓吹十二人步從惟中書
監盧志侍側方以帝幸甘泉壘帝令方具車載宮人寶物軍
人因妻略後宮分爭府威魏晉已來之積掃地無遺矣
行次新安寒甚帝墮馬傷足尚書高光進面衣帝嘉之
河間王顥帥官屬步騎三萬迎于霸上顥前拜謁帝乘
車止之以征西府爲宮唯僕射荀藩司隸劉暉太常鄭
球河南尹周馥與其遺官在洛陽爲留臺承制行事號
爲東西臺焉景午留臺大赦改元復爲永安辛丑復皇
后羊氏李雄僭號成都王劉元海僭號漢王十二月丁
亥詔曰天禍晉邦冢嗣莫繼成都王穎自在儲貳政績
虧損四海失望不可承重其以王還第豫章王熾先帝
愛子令聞日新四海注意令以爲皇太弟以隆我晉邦
以司空越爲太傅與太宰顥夾輔朕躬司徒王戎叅錄
朝政光祿大夫王衍爲尚書左僕射安南將軍虓安北

將軍濬平北將軍騰各守本鎮高密王簡爲鎮南將軍
領司隸校尉權鎮洛陽東中郎將模爲寧北將軍都督
冀州鎮于鄴鎮南大將軍劉弘領荊州以鎮南土周馥
繆胤各還本部百官皆復職齊王冏前應還第長沙王
乂輕陷重刑封其子紹爲樂平縣王以奉其嗣自頃戎
車屢征勞費人力供御之物皆減三分之二戶調田租
三分減一蠲除苛政愛人務本清通之後當還東京大
赦改元以河間王都督中外諸軍事

二年春正月甲午朔帝在長安夏四月詔封樂平王紹
爲齊王景子張方廢皇后羊氏六月甲子侍中司徒安
豐侯王戎薨隴西太守韓稚攻秦州刺史張輔殺之李
雄僭卽帝位國號蜀秋七月甲午尚書諸曹火燒崇禮
闕東海王越嚴兵徐方將西迎大駕成都王穎部將公
師藩等聚衆攻陷郡縣害陽平太守李志汲郡太守張
延等轉攻鄴平昌公模遣將軍趙驥擊破之八月辛丑
大赦驃騎將軍范陽王虓逐冀州刺史李義揚州刺史
曹武殺丹陽太守朱建李雄遣其將李驥寇漢安車騎
大將軍劉弘逐平南將軍彭城王釋于死九月庚寅朔
公師藩又害平原太守王景清河太守馮熊庚子豫州
刺史劉喬攻范陽王虓於許昌敗之壬子以成都王穎

爲鎮軍大將軍都督河北諸軍事鎮鄴河間王顥遣將軍呂朗屯洛陽冬十月景子詔曰得豫州刺史劉喬檄稱潁川大守劉輿迫脅驃騎將軍虓距逆詔令造構凶逆擅劫郡縣合聚兵衆擅用苟晞爲兗州斷截王命鎮南大將軍荊州刺史劉弘平南將軍彭城王釋等其各勒所統逕會許昌與喬并力今遣右將軍張方爲大都督統精卒十萬建武將軍呂朗廣武將軍騫羆建威將軍刁默等爲軍前鋒共會許昌除輿兄弟丁丑使前車騎將軍石超北中郎將王闡討輿等赤氣見于北方東西竟天有星孛于北斗平昌公模遣將軍宋胄等屯河

橋十一月立節將軍周權詐被檄自稱平西將軍復皇后羊氏洛陽令何喬攻權殺之復廢皇后十二月呂朗等東屯滎陽成都王穎進據洛陽張方劉弘等並按兵不能禦范陽王虓濟自官渡拔滎陽斬石超襲許昌破劉喬於蕭喬奔南陽右將軍陳敏舉兵反自號楚公矯稱被中詔從沔漢奉迎天子逐揚州刺史劉機丹陽太守王曠遣弟恢南略江州刺史應邈奔弋陽光熙元年春正月戊子朔日有蝕之帝在長安河間王顥聞劉喬破大懼遂殺張方請和於東海王越越不聽宋胄等破潁將樓哀進逼洛陽穎奔長安甲子越遣其

將祁弘宋曹司馬纂等迎帝三月東萊愷令劉柏根反
 自稱愷公襲臨淄高密王簡奔聊城王浚遣將討柏根
 斬之夏四月己巳東海王越屯于溫颺遣弘農太守彭
 隨北地太守刁默距祁弘等於湖五月在矢西南流范
 陽國地燃可以爨壬辰祁弘等與刁默戰默大敗颺
 走南山奔于宛弘等所部鮮卑大掠長安殺二萬餘人
 是日日光四散赤如血甲午又如之己亥弘等奉帝還
 洛陽帝乘牛車行宮籍草公卿跋沓戊申驃騎范陽王
 虓殺司隸校尉邢喬己酉盜取太廟金匱及策文各四
 六月景辰朔至自長安升舊殿哀感流涕謁于大廟復

皇后羊氏辛未大赦改元秋七月乙酉朔日有食之太
 廟吏賈苞盜太廟靈衣及劍伏誅八月以太傅東海王
 越錄尚書騎驃將軍范陽王虓為司空九月穎丘太守
 馮嵩執成都王穎送之于鄴進東嬴公騰爵為東燕王
 平昌公模為南陽王冬十月司空范陽王虓薨虓長史
 劉輿害成都王穎十一月庚午帝崩于顯陽殿時年四
 十八葬太陽陵帝之為太子也朝廷咸知不堪政事武
 帝亦疑焉嘗悉召東宮官屬使以尚書事令太子決之
 帝不能對賈妃遣左右代對多引古義給事張泓曰太
 子不學陛下所知今宜以事斷不可引書妃從之弘乃

具草令帝書之武帝覽而大悅太子遂安及居大位政
出羣下綱紀大壞貨賂公行勢位之家以貴陵物忠賢
路絕讒邪得志更相薦舉天下謂之互市焉高平王沉
作釋時論南陽魯褒作錢神論廬江杜嵩作任子春秋
皆疾時之作也帝又嘗在華林園聞蝦蟆聲謂左右曰
此鳴者爲官乎私乎或對曰在官地爲官在私地爲私
及天下荒亂百姓餓死帝曰何不食肉糜其蒙蔽皆此
類也後因食麪中毒而崩或云司馬越之端

史臣曰不才之子則天稱大權非帝出政還宵人褒姒
共叔帶並興襄后與犬戎俱運昔者丹朱不肖赧王逃
責相彼凶德事關休咎方乎土梗以墜其情溽暑之氣
將闌淫鼃之音罕記乃彰嗤笑用符顛隕豈通才俊彥
猶形於前代增淫助虐獨擅於當今者歟物號忠良於
茲拔本人稱妖孽自此疏源長樂不祥承華非命生靈
版蕩社稷丘墟古者敗國亡身分鑣共軫不有亂常則
多庸暗豈明神喪其精魄武皇不知其子也

贊曰惠皇居尊臨朝聽言厭體斯昧其情則昏高臺望
子長夜奚寃金墉毀冕蕩陰釋胄及爾皆亡滔天來遘

晉書卷四

Faint vertical text columns, likely bleed-through from the reverse side of the page.

